

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8



大佛頂如來密因修證了義諸菩薩萬行首
要解卷第六

唐天竺沙門般刺密諦譯

烏夷國沙門爾加釋迦譯語

C40
4514
231-1

E4823

當山正身無子外結布
坐卽不動出內
母姓慈通可印中本
東土置指此大藏經

△十一

卷六

性前正取諸身顯如來

藏故承陰入處界四科以明雖悟一身未融萬法
根境尚異見性不圓此復遠取諸物圓示藏性故

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

C 40-4514

了翁上座請大廣及有
家書置武州紫雲山
我微笑塔院瓦屋中永
為學者不敢許出院內
當山二世鐵牛機譯記



B·64853

大佛頂如來密因修證了義諸菩薩萬行首楞嚴經
要解卷弟六

唐天竺沙門般刺蜜譯譯

烏萇國沙門彌伽釋迦譯語

菩薩戒弟子前正議大夫同中書門下平
章事清河房融筆受

溫陵開元蓮寺比丘戒環解

△十一廣舉七大圓示藏性前近取諸身顯如來
藏故依陰入處界四科以明雖悟一身未融萬法
根境尚異見性不圓此復遠取諸物圓示藏性故

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

依地水火風空見識七大以明使悟物我同根是
非一體法法圓成塵塵周遍法界頌云若人欲識
真空理身內真如還徧外情與無情共一體處處
皆同真法界此七大之旨也謂之大者以性圓周
遍含吐十方爲義所以有七者萬法生成不離四
大而依空建立因見有覺因識有知故也前五無
情所具後二有情兼之今舉其七則萬法該矣七
大皆因識變故總之以識識則性覺之中妄爲明
覺者也所妄既立生彼妄能故有七大然彼大性
先非水火亦非空識全一如來藏體循業發現而
已七大旣爾萬法皆然凡我依正先非根身亦非
器界皆卽循業之相性真圓融初無生滅所以阿
難蒙佛開示身心蕩然得無罣礙了知世間諸所
有物皆卽妙心含裹十方反觀幻身起滅無從獲
本妙心常住不滅第二大科文終於此實發明要
旨修證密因也文二 初阿難發起

阿難白佛言世尊如來常說和合因緣一切世間種
種變化皆因四大和合發明云何如來因緣自然二
俱排擯我今不知斯義所屬唯垂哀愍開示衆生中
道了義無戲論法

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

此依權教問難由四大發起七大因緣自然之義

△二世尊垂答三 初愍告

爾時世尊告阿難言汝先狀離聲聞緣覺諸小乘法
發心勤求無上菩提故我今時爲汝開示第一義諦
如何復將世間戲論妄想因緣而自纏繞汝雖多聞
如說藥人真藥現前不能分別如來說爲真可憐愍
多聞如說藥諦義如真藥

△二許答

汝今諦聽吾當爲汝分別開示亦令當來修大乘者
通達實相阿難默然承佛聖旨

知七大本如來藏是謂通達實相

△三正答二 一總答

阿難如汝所言四大和合發明世間種種變化阿難
若彼大性體非和合則不能與諸大雜和猶如虛空
不和諸色若和合者同於變化始終相成生滅相續
生死死生生生死死如旋火輪未有休息
權教雖說和合都無實義蓋彼大性果非和合則
如虛空不和諸色殆不然也若果和合則同彼萬
變相成相續展轉虛妄又不然也旋火之輪無有
實體喻虛妄相成相續之相也

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8

撰述

卷之三

三

續六

阿難如水成冰冰還成水

直示大性非和不和之理而起後文故復召告也夫水何合而成冰冰何和而成水七大之性不因和合循業發現如此而已

△二別答七 一地大三 一標本

汝觀地性麤爲大地細爲微塵至鄰虛塵析彼極微色邊際相七分所成更析鄰虛卽實空性此標色雖可析空非可合將顯地性非和合也塵之細者曰微細之又細曰極微微之又微曰鄰虛極微之塵猶有微色故名色邊際相析極微爲七分則微色殆虛故名鄰虛

△二辯明

阿難若此鄰虛析成虛空當知虛空出生色相

先立理下辯明

汝今問言由和合故出生世間諸變化相汝且觀此一鄰虛塵用幾虛空和合而有不應鄰虛合成鄰虛又鄰虛塵析入空者用幾色相合成虛空此明諸變化相非和合法

若色合時合色非空若空合時合空非色色猶可析空云何合

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

色合則不應名空空合則不應析色知空非和合
則色非和合矣

△三結顯

汝元不知如來藏中性色真空性空真色清淨本然
周徧法界隨衆生心應所知量循業發現世間無知
惑爲因緣及自然性皆是識心分別計度但有言說
都無實義

如來藏性萬法一如而循發似異遂有七大之名
特體用異稱耳真空者一如之體也故七大皆言
真空七大卽循業之用也故曰性空真色乃至性
空真識體用不二故相依互舉不離妙性故一一
言性也不垢不淨曰清淨非和不和曰本然無乎
不在曰周徧旣非垢淨和合而能成七大萬法者
但隨心應量循業發現而已後云汝以空明則有
空現地水火風各各發明則各各現此隨心應量
之事也背覺合塵故發塵勞滅塵合覺故發真如
此循業發現之事也至於十界依正之相萬形纖
悉之理莫非隨應循發者也然此觀相元妄無可
指陳觀性元真唯妙覺明理絕情謂不容妄度故
但有言說都無實義所以第一義諦擬心則差動

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

念則乖惟居一切時不起妄念不用識心分別計
度然後相應也餘六同此

△二火大三 一標本

阿難火性無我寄於諸緣汝觀城中未食之家欲炊
爨時手執陽燧日前求火

火無自體寓物成形故曰無我陽燧鑄銅爲之似
鏡而凹

△二辯明

阿難名和合者如我與汝一千二百五十比丘今爲
一衆衆雖爲一詰其根本各各有身皆有所生氏族
名字如舍利弗婆羅門種優樓頻螺迦葉波種乃至
阿難瞿曇種姓阿難若此火性因和合有彼手執鏡
於日求火此火爲從鏡中而出爲從艾出爲於日來
阿難若日來者自能燒汝手中之艾來處林木皆應
受焚若鏡中出自能於鏡出燃于艾鏡何不鎔紅汝
手執尚無熟相云何融泮若生於艾何藉日鏡光明
相接然後火生

衆名和合詰之各有本根真和合也火名和合詰
之各無本根非和合矣優樓頻螺云木瓜林迦葉
波云龜氏瞿曇云地最勝亦云日種

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

汝又諦觀鏡因手執日從天來艾本地生火從何方遊歷於此日鏡相遠非和非合不應火光無從自有三物相遼火無方所凡所測度皆妄計也

△三結顯

汝猶不知如來藏中性火真空性空真火清淨本然周遍法界隨衆生心應所知量阿難當知世人一處執鏡一處火生徧法界執滿世間起起徧世間寧有方所循業發現世間無知惑爲因緣及自然性皆是識心分別計度但有言說都無實義

△三水大三 一標本

阿難水性不定流息無恒如室羅城迦毗羅仙斫迦羅仙及鉢頭摩訶薩多等諸大幻師求太陰精用和幻藥是諸師等於白月晝手執方諸承月中水此水爲復從珠中出空中自有爲從月來

求則流否則息所謂流息無常也迦毗羅等四皆外道善幻術太陰精月中之水也月望前曰白亭午曰晝方諸取水之珠卽陰燧也

△二辯明

阿難若從月來尚能遠方令珠出水所經林木皆應吐水流則何待方諸所出不流水非從月降

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

不流等者林木不吐流則知水非月降

若從珠出則此珠中常應流水何待中宵承白月晝
若從空生空性無邊水當無際從人洎天皆同滔溺
云何復有水陸空行合矣

水非月來又非珠出不從空生卽本然周遍非和

汝更諦觀月從天陟珠因手持承珠水盤本人敷設
水從何方流注於此月珠相遠非和非合不應水精
無從自有

例火大文

△三結顯

汝尚不知如來藏中性水真空性空真水清淨本然
周遍法界隨衆生心應所知量一處執珠一處水出
徧法界執滿法界生生滿世間寧有方所循業發現
世間無知惑爲因緣及自然性皆是識心分別計度
但有言說都無實義

初言汝元不知次言猶言尚言宛言全言曾而終
又言元者初言本元自迷所以不知暨再與明猶
且未諭故次言猶也後復與明而益不知故言尚
轉不知故言宛渾不知故言全甚不知故言曾終

不知故復言元也初意恕之終意責之輕重有序矣

△四風大三 一標本

阿難風性無體動靜不常汝常整衣入於大眾僧伽梨角動及傍人則有微風拂彼人面此風爲復出袈裟角發於虛空生彼人面

拂不則動垂衣則靜所謂動靜不常僧伽梨法衣也

△二辯明

阿難此風若復出袈裟角汝乃披風其衣飛搖應離汝體我今說法會中垂衣汝看我衣風何所在不應衣中有藏風地

辯非衣出也

若生虛空汝衣不動何因無拂空性常住風應常生若無風時虛空當減減風可見減空何狀若有生減不名虛空名爲虛空云何風出

辯非空生也虛空當減者謂無風時亦應無空

若風自生被拂之面從彼面生當應拂汝自汝整衣云何倒拂

辯非生彼面也風非衣出又非空生非生彼面了

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

無所從非和合矣

汝審諦觀整衣在汝面屬彼人虛空寂然不參流動
風自誰方鼓動來此風空性隔非和非合不應風性
無從自有

三者不參二性相隔求風所從杳莫可究信謂本
然周徧循業發現也風性或作風心誤也

△三結顯

汝寃不知如來藏中性風真空性空真風清淨本然
周徧法界隨衆生心應所知量阿難如汝一人微動
衣服有微風出徧法界拂滿國土生周徧世間寧有
方所循業發現世間無知惑爲因緣及自然性皆是
識心分別計度但有言說都無實義

言法界又言國土者遍界對一人言國土對衣服
言

△五空大四 一標本

阿難空性無形因色顯發如室羅城去河遙處諸刹
利種及婆羅門毗舍首陀兼頗羅墮旃陀羅等新立
安居鑿井求水出土一尺於中則有一尺虛空如是
乃至出土丈中間還得一丈虛空虛空淺深隨出
多少此空爲當因土所出因鑿所有無因自生

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

鑿土得空所謂因色顯發也西天貴賤族分四姓
如此方四民刹帝利王族也婆羅門淨志也毗舍
商賈也首陀農夫也是謂四姓頗羅墮利根也旃
陀羅魁膚也此又智愚之族

△二辯明

阿難若復此空無因自生未鑿土前何不無礙唯見
大地迥無通達若因土出則土出時應見空入若土
先出無空入者云何虛空因土而出若無出入則應
空土元無異因無異則同則土出時空何不出

無異因謂一體也

若因鑿出則鑿出空應非出土不因鑿出鑿自出土
云何見空

卽因不可離因亦非

汝更審諦諦審諦觀鑿從人手隨方運轉土因地移
如是虛空因何所出鑿空虛實不相爲用非和非合
不應虛空無從自出

令詳察其非因緣自然也鑿空虛實謂鑿實空虛
也上諸巧辯皆遺識心妄計而顯圓融真體也

△三會通

若此虛空性圓周遍本不動搖當知現前地水火風

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

均名五大性真圓融皆如來藏本無生滅

會上義而通前文也由上所明非因緣和合則知空性圓徧非生滅法一大既爾餘大皆然故通言地水火風云現前者使觸事而明無他求也阿難汝心昏迷不悟四大元如來藏當觀虛空爲出入爲非出入

若悟虛空性圓周遍本無出入卽悟四大性真圓融本無生滅也

△四結顯

汝全不知如來藏中性覺真空性空真覺清淨本然周徧法界隨衆生心應所知量阿難如一井空空生一井十方虛空亦復如是圓滿十方寧有方所循業發現世間無知惑爲因緣及自然性皆是識心分別計度但有言說都無實義

空與覺亦體用異稱也體用不二故相依而舉一井之空喻一法性也十方之空喻萬法性也由一觀萬由自觀他性無二別特形器妄辯耳

△六見大四 一標本

阿難見覺無知因色空有如汝今者在祇陀林朝明夕昏設居中宵白月則光黑月便暗則明暗等因見

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

分析此見爲復與明暗相并太虛空爲同一體爲非一體或同非同或異非異

見覺之體本自無知

△二辯明

阿難此見若復與明與暗及與虛空元一體者則明與暗二體相亾暗時無明明時無暗

上總標下詳辯相亾猶相奪也

若與暗一明則見亾必一於明暗時當滅滅則云何見明見暗若明暗殊見無生滅一云何成

辯非一體也

若此見精與暗與明非一體者汝離明暗及與虛空分柝見元作何形相離明離暗及離虛空是見元同龜毛兔角明暗虛空三事俱異從何立見

辯非異體也

明暗相背云何或同離三元無云何或異分空分見本無邊畔云何非同見暗見明性非遷改云何非異辯非或同非同或異非異也非遷改者明暗遷而見不改也

汝更細審微細審詳審諦審觀明從太陽暗隨黑月通屬虛空壅歸大地如是見精因何所出

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

令詳察其性真圓融不涉諸妄也深別曰審審議
曰詳當理曰諦諦視曰觀初於地獨言汝觀於火
言諦觀其次言更諦觀審諦觀至見重疊而言至
識審覆而言者意同言究竟全言曾之類爲其轉
不知渾不知甚不知故也

見覺空頑非和非合不應見精無從自出
當知性圓周徧本無生滅也

△三會通

若見聞知性圓周遍本不動搖當知無邊不動虛空
并其動搖地水火風均名六大性真圓融皆如來藏

本無生滅

例前會通之文

阿難汝性沉淪不悟汝之見聞覺知本如來藏汝當
觀此見聞覺知爲生爲滅爲同爲異爲非生滅爲非
同異

生滅同異皆因妄塵非生非異不離妄計離此諸
妄卽如來藏也

△四結顯

汝曾不知如來藏中性見覺明覺精明見清淨本然
周徧法界隨衆生心應所知量如一見根見周法界

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9 200

聽鶕嘗觸覺觸覺知妙德瑩然徧周法界圓滿十虛
寧有方所循業發現世間無知惑爲因緣及自然性
皆是識心分別計度但有言說都無實義
性見等者亦體用相依而舉有見有覺雖覺明之
咎而體實性見用實覺精也如一下例餘根也嘗
觸卽舌根以味合方覺故亦名觸覺觸覺知卽身
意也

△七識大四 一標本

阿難識性無源因於六種根塵妄出

根塵識三皆妄相因

汝今徧觀此會聖衆用目循歷其目周視但如鏡中
無別分佞性識於中次第標指此是文殊此富樓那
此目犍連此須菩提此舍利弗
示別了之體也

此識了知爲生於見爲生於相爲生虛空爲無所因
突然而出

見根也相境也

△二辯明

阿難若汝識性生於見中如無明暗及與色空四種
必無元無汝見見性尚無從何發識

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220 1 2 3 4 5 6 7 8 9 230 1 2 3 4 5 6 7 8 9 240 1 2 3 4 5 6 7 8 9 250 1 2 3 4 5 6 7 8 9 260 1 2 3 4 5 6 7 8 9 270 1 2 3 4 5 6 7 8 9 280 1 2 3 4 5 6 7 8 9 290 1 2 3 4 5 6 7 8 9 300 1 2 3 4 5 6 7 8 9 310 1 2 3 4 5 6 7 8 9 320 1 2 3 4 5 6 7 8 9 330 1 2 3 4 5 6 7 8 9 340 1 2 3 4 5 6 7 8 9 350 1 2 3 4 5 6 7 8 9 360 1 2 3 4 5 6 7 8 9 370 1 2 3 4 5 6 7 8 9 380 1 2 3 4 5 6 7 8 9 390 1 2 3 4 5 6 7 8 9 400 1 2 3 4 5 6 7 8 9 410 1 2 3 4 5 6 7 8 9 420 1 2 3 4 5 6 7 8 9 430 1 2 3 4 5 6 7 8 9 440 1 2 3 4 5 6 7 8 9 450 1 2 3 4 5 6 7 8 9 460 1 2 3 4 5 6 7 8 9 470 1 2 3 4 5 6 7 8 9 480 1 2 3 4 5 6 7 8 9 490 1 2 3 4 5 6 7 8 9 500 1 2 3 4 5 6 7 8 9 510 1 2 3 4 5 6 7 8 9 520 1 2 3 4 5 6 7 8 9 530 1 2 3 4 5 6 7 8 9 540 1 2 3 4 5 6 7 8 9 550 1 2 3 4 5 6 7 8 9 560 1 2 3 4 5 6 7 8 9 570 1 2 3 4 5 6 7 8 9 580 1 2 3 4 5 6 7 8 9 590 1 2 3 4 5 6 7 8 9 600 1 2 3 4 5 6 7 8 9 610 1 2 3 4 5 6 7 8 9 620 1 2 3 4 5 6 7 8 9 630 1 2 3 4 5 6 7 8 9 640 1 2 3 4 5 6 7 8 9 650 1 2 3 4 5 6 7 8 9 660 1 2 3 4 5 6 7 8 9 670 1 2 3 4 5 6 7 8 9 680 1 2 3 4 5 6 7 8 9 690 1 2 3 4 5 6 7 8 9 700 1 2 3 4 5 6 7 8 9 710 1 2 3 4 5 6 7 8 9 720 1 2 3 4 5 6 7 8 9 730 1 2 3 4 5 6 7 8 9 740 1 2 3 4 5 6 7 8 9 750 1 2 3 4 5 6 7 8 9 760 1 2 3 4 5 6 7 8 9 770 1 2 3 4 5 6 7 8 9 780 1 2 3 4 5 6 7 8 9 790 1 2 3 4 5 6 7 8 9 800 1 2 3 4 5 6 7 8 9 810 1 2 3 4 5 6 7 8 9 820 1 2 3 4 5 6 7 8 9 830 1 2 3 4 5 6 7 8 9 840 1 2 3 4 5 6 7 8 9 850 1 2 3 4 5 6 7 8 9 860 1 2 3 4 5 6 7 8 9 870 1 2 3 4 5 6 7 8 9 880 1 2 3 4 5 6 7 8 9 890 1 2 3 4 5 6 7 8 9 900 1 2 3 4 5 6 7 8 9 910 1 2 3 4 5 6 7 8 9 920 1 2 3 4 5 6 7 8 9 930 1 2 3 4 5 6 7 8 9 940 1 2 3 4 5 6 7 8 9 950 1 2 3 4 5 6 7 8 9 960 1 2 3 4 5 6 7 8 9 970 1 2 3 4 5 6 7 8 9 980 1 2 3 4 5 6 7 8 9 990 1 2 3 4 5 6 7 8 9 1000 1 2 3 4 5 6 7 8 9

明非生於見也

若汝識性生於相中不從見生既不見明亦不見暗
明暗不矚卽無色空彼相尚無識從何發
明非生於相也

若生於空非相非見非見無辯自不能知明暗色空
非相滅緣見聞覺知無處安立處此二非空則同無
有非同物縱發汝識欲何分別

明非生於空也若生於空則非是相亦非是見非
是見則無所辯非是相則無所緣若無所緣能緣
何立又處此非相非見之間識體若空則同龜毛
識體若有非同物象旣自無體安能有用故曰欲
何分別

若無所因突然而出何不日中別識明月

明非無因也

汝更細詳微細詳審見託汝睛相推前境可狀成有
不相成無如是識緣因何所出識動見澄非和非合
聞聽覺知亦復如是不應識緣無從自出

見托根相托境有出可狀無出非相識何所出耶
識有分別爲動見無分別爲澄識動見澄性相隔
異見與識隔聞知亦然皆非和合又非自然是則

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

性真圓融不涉諸妄矣

△三會通

若此識心本無所從當知了別見聞覺知圓滿湛然性非從所兼彼虛空地水火風均名七大性真圓融皆如來藏本無生滅此識心總指識大也了別見聞覺知別指六識也兼彼空等總會七大旁通萬法也旣本無所從則湛然圓徧地等旣爾世界衆生物物皆爾不唯地等名大草芥塵毛皆可名大性真圓融本無生滅矣前文詳辯意皆萃此故自根境萬法總會而旁通也

阿難汝心麤浮不悟見聞發明了知本如來藏汝應觀此六處識心爲同爲異爲空爲有爲非同異爲非空有

識體深潛當微細沉思不可麤浮觀得其真則悟其本如來藏矣

△四結顯

汝元不知如來藏中性識明知覺明真識妙覺湛然徧周法界含吐十虛寧有方所循業發現世間無知惑爲因緣及自然性皆是識心分別計度但有言說

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

都無實義

識知皆出於性明故曰性識明知知識雖覺明之咎其體實真故曰覺明真識體用不一真妄一真所以迭舉

△三時衆造悟自第二卷初發明至此造悟也文

一一一經家敘悟

爾時阿難及諸大衆蒙佛如來微妙開示身心蕩然得無罣礙是諸大衆各各自知心遍十方見十方空如觀手中所持葉物一切世間諸所有物皆卽菩提妙明元心心精徧圓含裹十方反觀父母所生之身猶彼十方虛空之中吹一微塵若存若亡如湛巨海流一浮漚起滅無從了然自知獲本妙心常住不滅禮佛合掌得未曾有於如來前說偈讚佛

自初決擇心見終至陰入七大多方發明使悟罣界萬法當體全真本如來藏是謂微妙開示也旣悟罣界性真圓融故身心蕩然得無罣碍悟妙覺湛然周徧法界故各各自知心遍十方也覺湛周遍含吐十虛故見十方空如手中葉萬法性真本如來藏故一切所有皆卽妙心也悟本心量廣大如此故反觀妄身其微如塵其幻如漚忽無所有

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

而本妙常心了了悟獲於是深慶說偈讚謝也

△二阿難偈讚三 一讚謝二 初讚

妙湛總持不動尊首楞嚴王世希有

妙湛總持卽澄圓妙性如來藏體前之屢稱妙覺
湛然不動周圓含吐十虛者此也人雖本具要由
首楞大定而發阿難旣自造悟遂知佛之所以爲
佛者特此而已故以是稱讚也覺海圓澄物不能
汨曰妙湛藏心遍圓含裹十方曰總持體寂如空
常住不滅曰不動具此而獨尊三界由此而爲諸
法王求之世間不可多得是誠希有也

△次謝

銷我億劫顛倒想不歷僧祇獲法身

無始迷真妄認緣影卽億劫倒想也一蒙開示了
獲本心卽不歷僧祇也

願今得果成寶王還度如是恒沙衆將此身心奉塵
刹是則名爲報佛恩伏請世尊爲證明五濁惡世誓
先入如一衆生未成佛終不於此取泥洹

旣悟自性深感發明之恩故願有所成弘道利生
稱佛心而上報也願得聖果智心也還度多衆悲
心也智悲雙運廣大無盡卽所謂深心也誓入五

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

撰述

濁不取涅槃卽深心之效也憑此報恩故請佛爲證也

△二重請

大雄大力大慈悲希更審除微細惑令我早登無上覺於十方界坐道場

旣讚謝已重請後法庶盡斷惑障成就果願也欲斷惑障須藉雄猛智力大慈悲德故備稱以重請也前發明心見顯如來藏方破見道麤惑次須決通疑滯開修證門以斷修道細惑詳審盡除乃登上覺自第四卷決通疑滯攝伏攀緣卽審除細惑之方也旣消倒想頓獲法身疑已得果且又願求而更除細惑者佛果有七曰菩提涅槃真如佛性菴摩羅識空如來藏大圓鏡智所謂獲法身者則分得菩提自見佛性而已見性之後必須審除細惑使生滅滅生俱寂以合乎涅槃真如白淨純凝以合乎菴摩羅識廓然圓照以合乎空如來藏大圓鏡智七果圓備乃所謂登無上覺也今之學者纔得其二頓忘餘五輕捐教法不復修斷則生滅何時而寂雜染何時而淨交交擾擾何時而廓然昏昏昧昧何時而圓照縱雖見性有爲習漏不免

復生吾知其倒想依然將又倍於億劫爲可歎惜矣聞此首楞畢竟之教快宜勉進疾使一切畢竟也

△三總結

舜若多性可銷亾爍迦羅心無動轉

舜若多此云空爍迦羅云堅固謂空性無體尚可銷亾我心堅固終無動轉此依楞嚴定力結前願心自誓究竟畢無退墮願心如此然後聖果可期佛恩可報也

大佛頂如來密因修證了義諸菩薩萬行首楞嚴經要解卷第六密因修證了義諸菩薩萬行首楞嚴經音切

燧

音先擊

燬

七亂

鎔

音容

糴

音糴

沿

燬

音切

燬

七亂

鎔

音糴

糴

音沿

沿

明

音切

突

陀骨

裹

音樂

判

音判

沿

吳江居士吳士龍施貴刻此釋道梅對

要解第六卷祈求早生貴子

嘉禾

萬曆癸巳仲冬徑山興聖萬壽禪寺識

溧水端繼慧刻

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

要解卷第六 密因修證了義諸菩薩萬行首楞嚴經
要解卷第七

音似

突厥音樂 曹世誠此依楞嚴定力結前題

數音

詠賦

費

容子

千財

比半

音迦

大佛頂如來密因修證了義諸菩薩萬行首楞嚴經
要解卷第七

唐天竺沙門般刺蜜譯

音似

烏萇國沙門

彌伽釋迦

譯語

入禪

菩薩戒弟子

前正議大夫同中書門下平

章事清河房融

受筆

溫陵開元蓮寺比丘戒

環解

△二深窮萬法決通疑滯入道以見性爲本了法
次之益雖見性不了萬法則觸途成滯故於發明
心見顯如來藏之後復以富那呈疑窮辯山河大

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

地諸有爲相使法法決了一無疑惑然後修進可以順造也文三

初富那疑問十大弟子阿難多聞富那說法各居第一前欲激發多聞狂慧使生正見故以阿難發一起此爲群疑塞滯須藉講通故以富那發起皆聖人應機方便也文二 初敘疑
爾時富樓那彌多羅尼子在大衆中卽從座起偏袒右肩右膝著地合掌恭敬而白佛言大威德世尊善爲衆生敷演如來第一義諦

先讚前法次敘疑情也冠三乘統萬法名第一義
諦

世尊常推說法人中我爲第一今聞如來微妙法音猶如聾人逾百步外聆於蚊蚋本所不見何況得聞佛雖宣明令我除惑今猶未詳斯義究竟無疑惑地前所宣明旨義幽遠根機昧劣故譬聾人百步聞蚋以第一法才猶昧則中下之機難無疑惑所以富那示疑而請也

世尊如阿難輩雖則開悟習漏未除我等會中登無漏者雖盡諸漏今聞如來所說法音尚紓疑悔

阿難習漏未除容有疑惑富那旣盡諸漏尚繫疑

悔則餘衆可知也

△二正問二 一問藏性清淨何生諸相

世尊若復世間一切根塵陰處界等皆如來藏清淨
本然云何忽生山河大地諸有爲相次第遷流終而
復始

清淨則宜無諸相本然則宜無遷流

△二問四大各徧云何相容

又如來說地水火風本性圓融周徧法界湛然常住
世尊若地性徧云何容水水性圓徧火則不生復云
何明水火二性俱徧虛空不相陵滅世尊地性障礙
空性虛通云何二俱周徧法界而我不知是義攸往
唯願如來宣流大慈開我迷雲及諸大衆作是語已
五體投地欽渴如來無上慈誨

二問皆躡前四科七大之文起疑也意以性相
違理事相礙實常情疑滯故爲致問庶獲決通

△二如來決答二 一通許

爾時世尊告富樓那及諸會中漏盡無學諸阿羅漢
如來今日普爲此會宣勝義中真勝義性令汝會中
定性聲聞及諸一切未得二空廻向上乘阿羅漢等
皆獲一乘寂滅場地真阿練若正修行處汝今諦聽

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

當爲汝說

有世俗諦有勝義諦脫俗冥真超情離妄世間三
有出世二乘以所知心不能測度是謂勝義諦中
真勝義性卽下文由覺明以辯真覺因了發以窮
諸妄至於山河不復出水火不相陵身舍十方毛
現塵刹皆勝義諦中真勝義性也定性聲聞卽沉
空趣寂者未得二空卽初心有學回向上升則大
心羅漢一乘寂滅場地卽冠三乘離諍論之真趣
也阿練若云無誼雜

富樓那等欽佛法音默然承聽

△二正答二答諸相所起三初明本

佛言富樓那如汝所言清淨本然云何忽生山河大
地汝常不聞如來宣說性覺妙明本覺明妙富樓那
言唯然世尊我常聞佛宣說斯義

性覺妙明本覺明妙者萬法體用異稱也能性一
切曰性覺性覺之妙顯乎明卽自體而出見於萬
法者也性之所本曰本覺本覺之明藏乎妙卽自
用而反冥於一真者也了斯二義則體用一覺物
我一妙無復諸相之異矣

佛言汝稱覺明爲復性明稱名爲覺爲覺不明稱爲

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

明覺

促舉前義問之定其解惑也夫汝所謂覺所謂明意作何解爲此性本自明靈然不昧故稱之爲覺耶爲復性自不明用心覺之故稱之爲明覺耶靈然不昧者真覺也用心覺之者妄覺也富樓那言若此不明名爲覺者則無所明富那意以性明爲覺不以不明爲覺故曰若此不明則無所明然不知纔有所明卽墮妄覺無窮妄業由是而生也故下云覺非所明因明立所所妄既立生汝妄能

佛言若無所明則無明覺

明覺之妄由所明起

有所非覺無所非明無明又非覺湛明性覺離能所故有所非覺照了諸相故無所非明若果非明又不得謂之覺湛明性當知有所無所是明非明皆爲妄度終非妙明明妙之真也

△二敘妄二 初二細所起

性覺必明妄爲明覺

前云性覺妙明此云性覺必明者湛然寂照曰妙明強生了知曰必明妙明則真必明則妄所以妄

爲明覺此卽三細之首妄識初相也起信云由不如實知真如法一故不覺心動卽此相也覺非所明因明立所既妄立生汝妄能無同異中熾然成異

真覺本無能所因必明故妄見有所能所既立心境互分故無同異中熾然成異卽轉相也

異彼所異因異立同同異發明因此復立無同無異如是擾亂相待生勞勞久發塵自相渾濁

以彼熾然之異爲異復因異相立同又因其有同有異故復立無同無異一真體中本無是事皆由能所對待妄立以擾發情塵遂使妙明斯渾妙湛斯濁晦昧空色自此兆矣卽現相也上三屬根本煩惱下起六麤卽枝葉也

△二六麤所起

由是引起塵勞煩惱

由三細而引起也染汚爲塵擾動爲勞憂煎爲煩迷亂爲惱卽智及相續執取計名四麤之總相自下世界相續衆生相續卽業相也業果相續卽業繫苦相也

△三感結三 一總明

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

起爲世界靜成虛空虛空爲同世界爲異彼無同異真有爲法

妄覺動則勞擾發塵故起爲世界妄覺伏則頑然冥漠故靜成虛空法界一空曰同情器萬殊曰異此乃於無同異中熾然成異故曰彼無同異真有爲法

△二別明三 一世界起始

覺明空昧相待成搖故有風輪執持世界因空生搖堅明立礙彼金寶者明覺立堅故有金輪保持國土堅覺寶成搖明風出風金相摩故有火光爲變化性寶明生潤火光上蒸故有水輪含十方界火騰水降交發立堅濕爲巨海乾爲洲渾以是義故彼大海中火光常起彼洲渾中江河常注水勢劣火結爲高山是故山石擊則成燄融則成水土勢劣水抽爲草木是故林藪遇燒成土因絞成水交妄發生遞相爲種以是因緣世界相續

萬法自五行變化五行由妄覺發生故世界起始肇於覺明而依乎風金水火以生成萬物也真覺妙空本非明昧由妄爲明覺遂有昧空明昧相傾則不覺心動故曰覺明空昧相待成搖故有風輪

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

世界最下依風輪住故曰執持世界因空生搖等者因空昧動念覺明堅執而立礙感金也大地最下依金輪起故曰保持國土堅覺寶成等者因堅覺妄搖觸起煩惱而感火也內外二界革生爲熟化有爲無皆火大所變故曰爲變化性寶明生潤等者由堅覺生識而蒸以煩惱積情發愛而感水也世界居大海內故曰含十方界火騰水降等者妄覺煩起妄識橫流交結立礙而感土也地性堅礙故曰立堅其高爲山其深爲海皆土也水阜曰洲沙汀曰渾諸皆肇於妄覺感於五行故曰交妄

發生遞相爲種也土水生木木土生金金木生火火金生水水火生土世界初由覺明發識爲水空昧結色爲土相待成搖爲風爲木卽土水生木也又因空昧之土生搖爲木而堅明立礙卽木土生金也餘文甚明土由水火所生若子受父母氣分故海中火起渾中水注也五行以我尅爲妻夫劣然後陰陽和而生子故水劣火爲山土劣水爲木焰融明水火氣分燒絞明土水氣分也此世界相續之由也

△二衆生起始

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

復次富樓那明妄非他覺明爲咎所妄既立明理不踰以是因緣聽不出聲見不超色色香味觸六妄成就由是分開見覺聞知同業相纏合離成化

明妄者指堅明明覺搖明之妄無他特覺明妄心爲咎耳真明妙理本無能所元一圓融清淨寶覺由所妄既立遂成隔礙故明理不踰以不踰故聽見六根於是妄局色香六塵於是妄染覺知六識於是妄分根塵識三爲業性故發起妄業於是同業相纏合離成化此六道四生之始也同業卽胎卵類因父母已三者業同故相纏著而有生合離卽濕化類不因父母但由已業或合濕而成形卽蠢蟻也或離異而托化如天獄鬼等類也

見明色發明見想成異見成憎同想成愛流愛爲種納想爲胎交遘發生吸引同業故有因緣生羯羅藍渴蒲曇等胎卵濕化隨其所應卵唯想生胎因情有濕以合感化以離應情想合離更相變易所有受業逐其飛沉以是因緣衆生相續

妄見所明而顯發妄色曰見明色發此由心生境也因明起見而因見生想曰明見想成此由境生情也見異則境違故成憎想同則心順故成愛三

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

撰述

九

續七

愛交注曰流三想相投曰納愛爲輪迴根本故流愛爲種想爲傳命之媒故納想成胎藉交遘而發生由同業而吸引此受生托質之始也胎中五位七日一變羯羅藍此云凝滑初七日之相也遏蒲曇云炮二七日之相也以至鉢羅奢佞性也四生之類卵應於想胎應於情濕應於合化應於離故曰隨其所應也亂思曰想結愛曰情氣附曰合合濕而生也形遁曰離離此生彼也情想合離有生皆具此以多分言耳卵生居首者想念初動情愛後起又兼胎濕化故也此文論想乃內分染想非升或沉無定趣也此衆生相續之由也

△三業果起始

外分淨想論化乃轉蛻業化非意生妙化也情想

合離更相變易者或情變爲想合變爲離無定業也卵易爲胎濕易爲化無定質也故所受業報或升或沉無定趣也此衆生相續之由也

生不斷是等則以欲貪爲本

富樓那想愛同結愛不能離則諸世間父母子孫相

父母子孫非愛不聚非欲不生

貪愛同滋貪不能止則諸世間卵化濕胎隨力強弱遞相吞食是等則以殺貪爲本

胎卵濕化以弱遭食緣貪起殺

以人食羊羊死爲人人死爲羊如是乃至十生之類
死死生生互來相噉惡業俱生窮未來際是等則以
盜貪爲本

不與而取曰盜又陰取曰盜以人食羊不與取也
羊死爲人互來相噉陰取也世間相噉皆盜貪也
淫殺盜三爲業果根本

汝負我命我還汝債以是因緣經百千劫常在生死
汝愛我心我憐汝色以是因緣經百千劫常在纏縛
上明業果之本此明相續之由負債殺盜由也愛

憐欲貪由也

唯殺盜姪三爲根本以是因緣業果相續

結顯也

△二 結答

富樓那如是三種顛倒相續皆是覺明明了知性因
了發相從妄見生山河大地諸有爲相次第遷流因
此虛妄終而復始

總牒前文結答世界衆生業果皆覺明爲咎也覺
明卽性覺必明者也明了知性卽妄爲明覺者也
了發相卽因明立所者也妄見卽生汝妄能者也

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

此虛妄指覺明也前問云何忽生山河至終而復始此全牒其辭而指覺明以答也

△四躡迹疑難二 一富那反難

富樓那言若此妙覺本妙覺明與如來心不增不減無狀忽生山河大地諸有爲相如來今得妙空明覺山河大地有爲習漏何當復生

妙覺指無真妄之體也本妙覺明依真起妄者也衆生覺體與佛無別無端忽生諸有爲相則如來既證空覺何時復生諸有耶此固常情所惑故特反難也

△二佛與曲盡五 一既覺不迷二 一喻明

佛告富樓那譬如迷人於一聚落惑南爲北此迷爲復因迷而有因悟所出富樓那言如是迷人亦不因迷又不因悟何以故迷本無根云何因迷悟非生迷云何因悟

聚落村市也漢書無燔聚落聚落喻性分南北喻迷倒然南北初不易則性分本無倒故曰迷本無根悟非生迷

佛言彼之迷人正在迷時候有悟人指示令悟富樓那於意云何此人縱迷於此聚落更生迷不不也世

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

尊

△二合顯

富樓那十方如來亦復如是此迷無本性畢竟空昔
本無迷似有迷覺覺迷滅覺不生迷

△二妙空無習二 一喻明

亦如翳人見空中華翳病若除華於空滅忽有愚人
於彼空華所滅空地待華更生汝觀是人爲愚爲慧
翳渝妄見華渝山河空華滅地渝妙空明覺

富樓那言空元無華妄見生滅見華滅空已是顛倒
勅令更出斯實狂癡云何更名如是狂人爲愚爲慧

△二合顯

佛言如汝所解云何問言諸佛如來妙覺明空何當
更出山河大地

既了所喻何復前疑

△三果覺無變

又如金鑛襍於精金其金一純更不成雜

△四果德無生

如木成灰不重爲木

△五結答

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

諸佛如來菩提涅槃亦復如是

菩提果覺也涅槃果德也果至無變無生則習漏
不生可知矣四喻之意前二明昔本無迷由妄
起後二明習漏妄緣證乃未斷若但舉前喻恐謂
妄不妨真惑能自滅成撥無執但舉後喻恐謂覺
本非淨性本有生成雜染見所以四喻兼舉使知
迷悟雖妄而不廢修證也

△二答四大相容二 一牒

富樓那又汝問言地水火風本性圓融周徧法界疑
水火性不相陵減又微虛空及諸大地俱徧法界不
合相容

△二答二 一畧明能容二 一引喻

富樓那譬如虛空體非群相而不拒彼諸相發揮
虛空非諸相而諸相依空而發真體非四大而四
大肇真而成先非水火故不相拒此總標下別釋
所以者何富樓那彼太虛空日照則明雲屯則暗風
搖則動霽澄則清氣凝則濁土積成霾水澄成映

此示諸相下明相容霾風雨土也
於意云何如是殊方諸有爲相爲因彼生爲復空有
若彼所生富樓那且日照時既是日明十方世界同

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

爲日色云何空中更見圓日若是空明空應自照云
何中霄雲霧之時不生光曜當知是明非日非空不
異空日觀相元妄無可指陳猶邀空華結爲空果云
何詰其相陵滅義觀性元真唯妙覺明妙覺明心先
非水火云何復問不相容者

觀相既妄陵滅亦妄觀性一真無不容者隨處而
發故曰殊方彼指日雲等也

△二合顯

真妙覺明亦復如是汝以空明則有空現地水火風
各各發明則各各現若俱發明則有俱現

此如空非相不拒發揮也汝以空明等者以事言
之如鑿井出空照燧生火是也以業言之如起爲
世界靜成虛空風金相摩故有火光是也以心言
之妄起空見則有空現地水火風亦復如是故曰
各各發明則各各現各各謂前後也俱謂同時也
云何俱現富樓那如一水中現於日影兩人同觀水
中之日東西各行則各有日隨二人去一東一西先
無準的不應難言此日是一云何各行各日旣雙云
何現一宛轉虛妄無可憑據

釋俱現之相也日影隨人不一如七大隨緣成異

先無准的不應詰難

△二廣明互現三 一隨妄發現

富樓那汝以色空相傾相奪於如來藏而如來藏隨爲色空周徧法界是故於中風動空澄日明雲暗衆生迷悶背覺合塵故發塵勞有世間相

迷失真體分別緣影名背覺合塵了相元妄觀性元真名滅塵合覺

△二依真發現

我以妙明不滅不生合如來藏而如來藏唯妙覺明圓照法界是故於中一爲無量無量爲一小中現大中現小不動道場徧十方界身含十方無盡虛空於一毛端現寶王刹坐微塵裏轉大法輪

色空世間妄相也妙明真如妙性也皆如來藏所現元一圓融特由衆生背真合妄故局促世相之中諸佛滅妄合真故妙得真如之用所以一多互應小大相容現寶刹於毛端轉法輪於塵裏事事無礙法法如如蓋由觀相元妄無可指陳觀性元真故無不容者

△三離即圓會三 一依體圓非

滅塵合覺故發真如妙覺明性而如來藏本妙圓心

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

非心非空非地非水非風非火

雖滅塵發真於一多小大能一切如而本妙圓體
初無變異故非心非火乃至非世出世法也非心
非火謂非七大五陰也心卽識大而攝五陰
非眼非耳鼻舌身意非色非聲香味觸法非眼識界
如是乃至非意識界

謂非十八界亦攝十二處

非明無明無盡如是乃至非老非死非老死盡
非緣覺法也緣覺觀十二緣欲纏無明爲明十二
緣有生起相有修斷相此兼舉之

非苦非集滅非道非智非得

非聲聞法也聲聞修四諦法以智爲能證以果爲
所得

非檀那非尸羅非毗梨耶非羼提非禪那非般刺若
非波羅蜜多

非菩薩法也菩薩修六度行檀等卽施戒忍進禪
智也波羅蜜卽度也

如是乃至非怛闌阿竭非阿羅訶三耶三菩

非如來法也怛闌阿竭此云如來阿羅訶云應供
三耶三菩云正徧知卽十号之三也

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

非大涅槃非常非樂非我非淨

非佛果法也常樂我淨爲涅槃四德

以是俱非世出世故

結上起下也自七大至十八界爲世間法自緣覺至大涅槃爲出世法

△二依用圓卽

卽如來藏元明心妙卽心卽空卽地卽水卽風卽火卽眼卽耳鼻舌身意卽色卽聲香味觸法卽眼識界如是乃至卽意識界卽明無明明無明盡如是乃至卽老卽死卽老死盡卽苦卽集卽滅卽道卽智卽得卽檀那卽尸羅卽毗梨耶卽羼提卽禪那卽般刺若卽波羅蜜多如是乃至卽怛闐阿竭卽阿羅訶三耶三菩卽大涅槃卽常卽樂卽我卽淨

體雖無變用乃如如故卽心卽法卽法卽心也

△三雙會圓泯

以是俱卽世出世故卽如來藏妙明心元離卽離非是卽非卽

旣非而卽卽而非妙絕心言不容測度矣此文似乎矯亂而各有所主初曰本妙圓心自體言也次曰元明心妙自用言也終曰妙明心元合體用

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

言之也本妙圓心是本非末是圓非偏是心非物乃真淨妙體故非一切法也元明心妙是元非本是明非體乃如妙用故卽一切法也妙明心元是妙之明是心之元微妙並觀故離卽離非是卽非卽妙造乎此則體用圓泯情謂斯絕而藏心妙性廓無瑕玷矣

△三結責妄度

如何世間三有衆生及出世間聲聞緣覺以所知心測度如來無上菩提用世語言入佛知見

結妙絕心言責其妄度蓋爲擬心動念卽乖法體愛念小乘得少爲足

譬如琴瑟箜篌琵琶雖有妙音若無妙指終不能發汝與衆生亦復如是寶覺真心各各圓滿如我按指海印發光汝暫舉心塵勞先起由不勤求無上覺道愛念小乘得少爲足

琴音雖具非指不發人心雖圓非師不悟前之多方顯如來藏卽佛之按指也身心萬法當處昭然卽海印發光也而富那等隨語生解疑慮紛紜是塵勞先起也此由不求無上覺道愛念小乘之咎也今夫宗師扣擊直下歷然學者因之競生狂解

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

皆由情塵易起故動涉疑妄使知無上覺道則一唱一酬足以廓清天地何復塵勞之有大集經云闍浮萬像皆現海中故名海印

△四躡迹疑難二 一富那疑難二 初問難

富樓那言我與如來寶覺圓明真妙淨心無二圓滿而我昔遭無始妄想久在輪迴今得聖乘猶未究竟世尊諸妄一切圓滅獨妙真常敢問如來一切衆生何因有妄自蔽妙明受此淪溺

躡上各各圓滿之言發問也既悟無二益顯妄淪而不知妄之所由故請窮其因

△二答難三 一原妄所起二 初引喻

佛告富樓那汝雖除疑餘惑未盡吾以世間現前諸事今復問汝汝豈不聞室羅城中演若達多忽於晨朝以鏡照面愛鏡中頭眉目可見嗔責已頭不見面目以爲魑魅無狀狂走於意云何此人何因無故狂走富樓那言是人心狂更無他故

演若達多狂人也愛鏡中頭責已狂走喻因執影明遂迷本真妄隨流轉

△二法合

佛言妙覺明圓本圓明妙既稱爲妄云何有因若有

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

撰述

所因云何名妄自諸妄想展轉相因從迷積迷以歷塵劫雖佛發明猶不能返

妙覺明圓指我與如來無二圓滿者本圓明妙言本無虧欠本無迷妄也此人人本來面目也奈何以妄二之虧之遂分物我強起愛憎諸妄相因迷輪不返

如是迷因因迷自有識迷無因妄無所依尚無有生欲何爲滅得菩提者如寤時人說夢中事心縱精明欲何因緣取夢中物況復無因本無所有富那自恨昔遭妄想而稱世尊諸妄圓滅似謂迷有所因妄有可滅故告以此

如彼城中演若達多豈有因緣自怖頭走忽然狂歇頭非外得縱未歇狂亦何遺失富樓那妄性如是因何爲狂

牒喻重顯令了妄無因無可滅者

△二勸息妄緣

汝但不隨分別世間業果衆生三種相續三緣斷故三因不生則汝心中演若達多狂性自歇世間業果衆生皆妙心影明如鏡中頭分別則妄故不隨分別則狂性自歇也以世間業果衆生爲

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

三緣者妄心緣之而起也以殺盜婬爲三因者妄
心因之而有也所謂自諸妄想展轉相因故斷而
不生則狂性自歇

△三妄息真現

歇卽菩提勝淨明心本周法界不從人得何藉劬勞
肯綮修證

所謂但離妄緣卽如如佛也肉間骨曰肯骨肉之
間小結可啓曰綮莊子技經肯綮之未嘗今以肯
綮譬斷微細感結蓋劬勞修證只爲妄感妄因旣
息惑結自除故不勞肯綮也

譬如有人於自衣中繫如意珠不自覺知窮露他方
乞食馳走雖實貧窮珠不曾失忽有智者指示其珠
所願從心致大饒富方悟神珠非從外得

譬妄息真現不勞修證也

△二阿難疑難二一問難

卽時阿難在大衆中頂禮佛足起立白佛世尊現說
殺盜婬業三緣斷故三因不生心中達多狂性自歇
歇卽菩提不從人得斯則因緣皎然明白云何如來
頓棄因緣我從因緣心得開悟世尊此義何獨我等
年少有學聲聞今此會中大目犍連及舍利弗須苦

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

撰述

提等從老梵志聞佛因緣發心開悟得成無漏

遁躡上文起難爲後學決疑也上稱緣斷而因不生斯正因緣之義何前言頓棄耶從老梵志者須菩提等皆晚年從外道來

今說菩提不從因緣則王舍城拘舍梨等所說自然成第一義唯垂大悲照發迷悶

今棄因緣則外道自然之執爲當矣富那之後又以阿難問難者諸法既明則進修無滯將示修證之門故復以當機之人發起

△二答難五 一例前推本

佛告阿難卽如城中演若達多狂性因緣若得滅除則不狂性自然而出因緣自然理窮於是

本狂因旣滅則自然性出不狂之前二皆本無由是觀之凡所謂因緣自然本皆不有悉由狂妄而立

故曰理窮於是

△二詳明妄立三 一以因緣破自然

阿難演若達多頭本自然本自其然無然非自何因緣故怖頭狂走

自然者本自天然不假因緣也若本自然則或狂不狂無所然而非自矣夫何又假照鏡因緣而後

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

狂走此自然之計墮矣

△二以自然破因緣

若自然頭因緣故狂何不自然因緣故失本頭不失狂怖妄出曾無變易何藉因緣

若本自不狂假因緣故狂則本自不失蓋假因緣故失頭既不失特由狂妄則因緣之計墮矣

△三明妄立

本狂自然本有狂怖未狂之際狂何所潛不狂自然頭本無妄何爲狂走

若狂怖本於自然則是本有狂怖然既無所潛非本狂矣若狂怖不本於自然則頭本無妄何爲狂走非本不狂矣既非本狂非不本狂足知自然因緣之說皆妄立也

△三令悟實相

若悟本頭識知狂走因緣自然俱爲戲論是故我言三緣斷故卽菩提心

若悟本真則知諸妄了不相關真見性人一切妄緣豁然蕩絕得大解脫者以此

△四示無戲論

菩提心生生滅心滅此但生滅滅生俱盡無功用道

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

若有自然如是則明自然心生生滅心滅此亦生滅無生滅者名爲自然猶如世間諸相雜和成一體者名和合性非和合者稱本然性本然非然和合非合合然俱離離合俱非此句方名無戲論法
菩提心中本無生滅亦無自然若謂菩提心生生滅心滅此但生滅非菩提也若謂滅生俱盡無功用道有自然者因是則明自然心生生滅心滅此亦生滅非菩提也而又反指無生滅者名爲自然皆則戲論譬如因有雜和故說和合而反指非和合者稱本然性是皆對妄立戲論之法直使然與非然合與非合一切遠離亦無離與不離之心乃真無功用道無戲論法也

菩提涅槃尚在遙遠非汝歷劫辛勤修證雖復憶持十方如來十二部經清淨妙理如恒河沙祇益戲論此責其妄計戲論難契菩提故曰菩提遙遠非汝能證雖持多經只益戲論也

△五結咎勸修

汝雖談說因緣自然決定明了人間稱汝多聞第一以此積劫多聞熏習不能免離摩登伽難何須待我佛頂神呪摩登伽心姪火頓歇得阿那含於我法中

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

成精進林愛河乾枯令汝解脫是故阿難汝雖歷劫
憶持如來秘密妙嚴不如一日修無漏業遠離世間
憎愛二苦

因緣自然有益於辨無益於道多聞第一有益於
名無益於實故雖積劫熏持不如一日修無漏業
無漏業者首楞真定也得此定者永滅諸漏故離
憎愛苦

如摩登伽宿爲姪女由神呪力銷其愛欲法中今名
性比丘尼與羅睺母耶輸陀羅同悟宿因知歷世因
貪愛爲苦一念熏修無漏善故或得出纏或蒙授記
明熏無漏業之速効也摩登伽此云本性故云性
比丘尼宿因卽歷世貪愛苦因也出纏登伽也授
記耶輸也

如何自欺尚留觀聽

結責阿難令捨苦本修無漏道無以貪愛存於心
目也自初決擇真妄發明覺性乃至深窮萬法決
通疑滯皆爲寂初方便使其信解真正爲因地心
因心旣真斯可圓成果地修證故前經止此別起

下文

大佛頂如來密因修證了義諸菩薩萬行首楞嚴經

110 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9 200

要解卷第七

音切

逾

羊朱
切

蚋

而銑
切

渾

胡昆
切

烝

諸仍
切

潭

徒旱
切

遞

音
第條
叔

遏

鳥葛
切

蒲

薄胡
切

駢

於計
切

拒

巨屯
切

邀

於宵
切

靈

埋
音

準

之尹
切

詰封淑人吳江金氏三慧同男吳士彥共施刻首楞嚴經要解第七卷薦布政吳承薰往生安養嘉禾釋道梅對瞑寧唐士登書溧水毛倫刻萬曆癸巳仲冬徑山興聖萬壽禪寺識

大佛頂如來密因修證了義諸菩薩萬行首楞嚴經要解卷第八

唐天竺沙門般刺蜜諦譯

烏萇國沙門彌伽釋迦譯語

菩薩戒弟子前正議大夫同中書門下平
章事清河房融筆受

溫陵開元蓮寺比丘戒環解

△二修道分雖見性真非修莫證故卽前了義示
修行門文三

初修行真基二 初阿難伸請

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

阿難及諸大衆聞佛示誨疑惑銷除心悟實相身意
輕安得未曾有重復悲淚頂禮佛足長跪合掌而白
佛言無上大悲清淨寶王善開我心能以如是種種
因緣方便提獎引諸沉冥出於苦海

讚謝前法也惑消心悟身意輕安謝發明覺性決

通疑滯之益也多方誨示爲無上大悲洗我沉垢

爲清淨寶王

世尊我今雖承如是法音知如來藏妙覺明心徧十
方界含育如來十方國土清淨寶嚴妙覺王刹如來
復責多聞無功不逮修習

引前請後也

我今猶如旅泊之人忽蒙天王賜與華屋雖獲大宅
要因門入唯願如來不捨大悲示我在會諸蒙暗者
捐捨小乘畢獲如來無餘涅槃本發心路今有學者
從何攝伏疇昔攀緣得陀羅尼入佛知見

失性如旅泊見性如華屋見性不修如獲屋不入
故請如來本發心路冀入佛知見也無餘涅槃圓
果也本發心路圓因也陀羅尼圓行也佛知見圓
解也既已見性又求入佛知見者見方開示修乃
悟入周稱天子曰天王簡諸王也

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

作是語已五體投地在會一心佇佛慈旨

△二佛慈開示二 初敘意標宗

爾時世尊哀愍會中緣覺聲聞於菩提心未自在者及爲當來佛滅度後末法衆生發菩提心開無上乘妙修行路宣示阿難及諸大衆汝等決定發菩提心於佛如來妙三摩提不生疲倦應當先明發覺初心二決定義

妙三摩提卽首楞正定二決定義卽因心業本也

△二開示二義二 一審因心二 一總教

云何初心二義決定阿難第一義者汝等若欲捐捨聲聞修菩薩乘入佛知見應當審觀因地發心與果地覺爲同爲異阿難若於因地以生滅心爲本修因而求佛乘不生不滅無有是處

不滅不生合如來藏爲同以生滅心求常住果爲異

△二審察二 一外審

以是義故汝當照明諸器世間可作之法皆從變滅阿難汝觀世間可作之法誰爲不壞然終不聞爛壞虛空何以故空非可作由是始終無壞滅故

使先審有爲法無非幻妄例明已身卽幻妄本唯

湛圓真體終無滅壞是爲真基也

△二內審二 一明妄三 一示濁因

則汝身中堅相爲地潤濕爲水煖觸爲火動搖爲風
由此四纏分汝湛圓妙覺明心爲視爲聽爲覺爲察
從始入終五疊渾濁

四大假幻妄之身縛性爲纏五疊織見覺之妄汨
湛爲濁纏爲生死根本濁爲惑業根本故應審明
△二明濁相

云何爲濁阿難譬如清水清潔本然卽彼塵土灰沙
之倫本質留礙二體法爾性不相循有世間人取彼
土塵投於淨水土失留礙水亾清潔容貌汨然名之
爲濁汝濁五重亦復如是

清水覺湛明性也塵沙煩惱惑業也性不相循真
妄染淨異也世間人非出世智也故起惑擾湛使
性渾濁

△三釋濁義此五濁義與法華別蓋彼依果言此
依因言也因者由於覺湛明性警起妄惑汨湛成
濁次第有五劫濁者劫云時分卽三細初不覺心
動之相爲無明初起之時非劫末之劫濁也見濁
卽轉相現相也煩惱濁卽六麤前四衆生濁卽業

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

撰述

相命濁業繫苦相也文五 一劫濁

阿難汝見虛空徧十方界空見不分有空無體有見無覺相織妄成是第一重名爲劫濁

覺非空色由一念不覺妄見空相以生發遍迷故空見不分以不分故有空無體爲雜於見也有見無覺爲雜於空也此無明初起混茫之相也故爲第一重

見濁

汝身現搏四大爲體見聞覺知壅令留礙水火風土旋令覺知相織妄成是第二重名爲見濁

真性廓湛本無見覺由四大搏結以成根隔故見覺生而廓湛壅四大旋而覺知生是謂相織

三煩惱濁

又汝心中憶識誦習性發知見容現六塵離塵無相離覺無性相織妄成是第三重名煩惱濁

憶識誦習卽智及相續執取計名之事也由是於性之內分發六知根容之外分現六塵境根境煩構以惱湛性名煩惱濁

四衆生濁

又汝朝夕生滅不停知見每欲留於世間業運每常

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

遷於國土相織妄成是第四重名衆生濁

朝夕生滅卽造業相也知見欲留卽戀著三界業
運常遷卽隨趣受生此所以爲衆生也

△五命濁

汝等見聞元無異性衆塵隔越無狀異生性中相知
用中相背同異失準相織妄成是第五重名爲命濁
見聞自湛圓而分故元無異性衆塵隔圓融之體
故無端成異自性觀之同一真常故曰相知自用
觀之互起生滅故曰相背真常生滅同異和合失
其準常是命濁之妄織也五濁從細至麤有生皆
具所謂生死根本虛妄滅生者也

△二審真

阿難汝今欲令見聞覺知遠契如來常樂我淨應當
先擇死生根本依不生滅圓湛性成以湛旋其虛妄
滅生伏還元覺得元明覺無生滅性爲因地心然後
圓成果地修證如澄濁水貯於靜器靜深不動沙土
自沉清水現前名爲初伏客塵煩惱去泥純水名爲
永斷根本無明明相精純一切變現不爲煩惱皆合
涅槃清淨妙德

見聞覺知六受用根也常樂我淨涅槃妙德也生

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

死根本五濁業用也夫欲反妄契真先當擇去生
死妄本依不生滅圓湛之性以成其功如澄濁水
必於靜器以湛旋其虛妄使伏還元覺如以靜沉
其沙土使清水現前也此則初伏客塵煩惱而已
蓋方旋之使伏非真無生滅性也及得其本元真
明之覺無生滅性則無明之根本永斷而覺湛明
相於是精純一切變現不爲煩惱如去泥純水一
任攬淘無復汨濁乃可爲因地心也因心如此則
果地修證無有不圓涅槃妙德無有不合故因心
不可不審也

△二審業本五 一總教審察

第二義者汝等必欲發菩提心於菩薩乘生大勇猛
決定棄捐諸有爲相應當審詳煩惱根本此無始來
發業潤生誰作誰受阿難汝修菩提若不審觀煩惱
根本則不能知虛妄根塵何處顛倒處尚不知云何
降伏取如來位

無明發業愛取潤生六識能作梨耶能受潛爲煩
惱根本發爲虛妄根塵知之乃可降伏降之乃可
取果

阿難汝觀世間解結之人不見所結云何知解不聞

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

虛空被汝隳裂何以故空無形相無結解故

釋上須知其處也引空義者謂除無結則無解而孰能無結哉

△二正示業本

則汝現前眼耳鼻舌及與身心六爲賊媒自劫家寶
由此無始衆生世界生纏縛故於器世間不能超越
示虛妄根塵顛倒處也眼耳六賊妄根也媒引六
境妄塵也自劫真性自生纏縛顛倒也衆生世界
卽根身也器世間卽三界也

△三廣明妙用

阿難云何名爲衆生世界世爲遷流界爲方位汝今
當知東西南北東南西南東北西北上下爲界過去
未來現在爲世方位有十流數有三一切衆生織妄
相成身中貿遷世界相涉

衆生世界亦具四方卽左右前後是也世者三際
迭遷界者各有定位界位有十世數有三一身所
具理自互涉故曰身中貿遷世界相涉

而此界性設雖十方定位可明世間祇目東西南北
上下無位中無定方

方雖有十常數唯四

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

四數必明與世相涉三四四三宛轉十二流變三疊
一百千總括始終六根之中各各功德有千二百
三四互涉故曰宛轉三世流變故有三疊自一疊
十十疊百百疊千成千二百六根各具然此權依
世論以顯妙用大略耳若夫六解一亾互用圓照
夫何數量所及

阿難汝復於中克定優劣如眼觀見後暗前明前方
全明後方全暗左右傍觀三分之二統論所作功德
不全三分言功一分無德當知眼唯八百功德
依四方論則一方三百以三分言則一分四百先
顯織妄欲明根結之始使知所解也次辯優劣欲
明耳根圓通使知所選也

如耳周聽十方無遺動若邇遙靜無邊際當知耳根
圓滿一千二百功德

能周聽故功全也動若等者隨彼之動則似有近
遠在我之靜則周聽無邊

如鼻艱聞通出入息有出有入而闕中交驗於鼻根
三分闕一當知鼻唯八百功德

出能取香入能聞香出入之中無能故闕中交
如舌宣揚盡諸世間出世間智言有方分理無窮盡

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8

當知舌根圓滿一千二百功德

世出世智所知之境唯舌詮顯其言雖局其理不窮

如身覺觸識於違順合時能覺離中不知離一合雙驗於身根三分闕一當知身唯八百功德

離闕一分合全二分曰離一合雙

如意默容十方三世一切世間出世間法唯聖與凡無不包容盡其涯際當知意根圓滿一千二百功德

△四牒審圓根二 一總告

阿難汝今欲逆生死欲流返窮流根至不生滅當驗

此等六受用根誰合誰離誰深誰淺誰爲圓通誰不圓滿若能於此悟圓通根逆彼無始織妄業流得循圓通與不圓根日劫相倍

流根卽妙湛不動者也決之而出流逸奔境名生死流逆之而入反流全一名不生滅六受用根卽上所明者循圓則合性而深不圓則離性而淺深淺相遼故遲速之功日劫相倍夫欲速反須擇圓根也

我今備顯六湛圓明本所功德數量如是隨汝詳擇其可入者吾當發明令汝增進十方如來於十八界

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

一一修行皆得圓滿無上菩提於其中間亦無優劣
但汝下劣未能於中圓自在慧故我宣揚令汝但於
一門深入入一無妄彼六知根一時清淨

得圓自在慧則十八界無非圓通然下劣初機未
能圓得且自一門而入一根無妄則六皆清淨不
唯悟十八界塵塵刹刹皆圓通矣

△二別明二 一問

阿難白佛言世尊云何逆流深入一門能令六根一
時清淨

△二答四 一辯惑

佛告阿難汝今已得須陀洹果已滅三界衆生世間
見所斷惑然猶未知根中積生無始虛習彼習要因
修所斷得何況此中生住異滅分劑頭數

湛圓因惑而分一六因惑而生故將告一六之義
先與辯惑也小乘見道門斷三界貪嗔癡等十分
別惑乃證初果故曰已得陀洹已滅見惑也修道
門斷三界貪嗔癡慢四俱生惑亦曰思惑此乃根
中累生無始虛習三果乃斷所以阿難未知也況
此根中更有生住異滅諸微細惑其分劑頭數又
非阿難所知者斷盡此惑六湛乃圓

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

△二推明

今汝且觀現前六根爲一爲六阿難若言一者耳何不見目何不聞頭奚不履足奚無語若此六根決定成六如我今會與汝宣揚微妙法門汝之六根誰來領受阿難言我用耳聞佛言汝耳自聞何關身口口來問義身起欽承

耳不見足無語不可以爲一也耳聞法而身口同不可以爲六也

是故應知非一終六非六終一終不汝根元一元六阿難當知是根非一非六由無始來顛倒淪替故於

圓湛一六義生

旣無定趣則一六之義非本元有由顛倒生

汝須陀洹雖得六銷猶未亾一

六者麤惑妄結也一者法執細識也須陀洹已斷麤惑不入色聲香味觸法是得六銷而尚滯法執是未亾一也以後文證之此乃方得人空而未能成法解脫至俱空不生乃亾一矣然小乘必消六然後亾一大乘直亾一使六自消叔世窮道雖曰得妙竟涉離微求其真能亾一者不可多得覆尋聖言蓋深有所發也

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

如太虛空參合群器由器形異名之異空除器觀空說空爲一彼太虛空云何爲汝成同不同何況更名是一非一則汝了知六受用根亦復如是虛空本非同異喻湛圓本非一六合器除器喻一六義生之由也知太虛之同異是非了無所立則一六併凸而湛圓不分矣

△三原妄一六旣無而現有六根者由粘湛妄發耳故原其妄發之源以示之文七 一原眼

妙湛圓明本非見覺由粘妄失真於是發見

見精映色結色成根根元目爲清淨四大因名眼體如蒲萄朶浮根四塵流逸奔色

見精眼識也色眼塵也二者妄結以成眼根此根之元攬四大而成體以未奔境故名清淨方是之時如蒲萄朶而已蓋體雖具而識未流所謂但如鏡中無別所知者是也及乎流逸奔境則染故轉名浮根四塵而不名清淨四大

△二原耳

由動靜等二種相擊於妙圓宇粘湛發聽聽精映聲卷聲成根根元目爲清淨四大因名耳體如新卷葉

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

浮根四塵流逸奔聲

自此而下皆例上釋新卷葉則有竅而已

△三原鼻

由通塞等二種相發於妙圓中粘湛發煦煦精映香納香成根根元目爲清淨四大因名鼻體如雙垂爪浮根四塵流逸奔香

△四原舌

由恬變等二種相參於妙圓中粘湛發嘗嘗精映味絞味成根根元目爲清淨四大因名舌體如初偃月浮根四塵流逸奔味

常性爲恬奔味爲變初生之月偃然舌相如之皆喻無情之物者明體雖具而識未流也

△五原身

由離合等二種相摩於妙圓中粘湛發覺覺精映觸搏觸成根根元目爲清淨四大因名身體如腰鼓頸浮根四塵流逸奔觸

覺精身識也腰鼓頸徒有觸體未有觸用喻清淨根元也頸喻根元則鼓喻浮根元因浮根然後流如頸因成鼓然後觸

△六原意

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

由生滅等二種相續於妙圓中粘湛發知知精映法
攬法成根根元目爲清淨四大因名意思如幽室見
浮根四塵流逸奔法

暗室之見亦有體而已識未流也

△七結顯

阿難如是六根由彼覺明有明明覺失彼精了黏妄
發光

有明明覺如所謂性覺必明妄爲明覺也黏妄發
光則妄有見覺也

是以汝今離暗離明無有見體離動離靜元無聽質
無通無塞覩性不生非變非恬嘗無所出不離不合
覺觸本無無滅無生了知安寄

釋上因妄發故六皆虛妄若離六塵悉無自體了
知卽意用也

△四顯圓四 一開發

汝但不循動靜合離恬變通塞生滅明暗如是十二
諸有爲相隨拔一根脫粘內伏伏歸元真發本明耀
耀性發明諸餘五粘應拔圓脫

彼十二相能粘六根障湛明故拔一根而本明發
本明一發則妄粘皆脫而圓矣

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

不由前塵所起知見明不循根寄根明發由是六根
互相爲用

粘妄則由前塵循浮根故成隔礙脫粘則不由不
循特寄根而已故能互用

△二引證

阿難汝豈不知今此會中阿那律陀無目而見跋難
咤龍無耳而聽殞伽神女非鼻聞香驕梵鉢提異舌
知味舜若多神無身覺觸如來光中映令暫現旣爲
風質其體元無諸滅盡定得寂聲聞如此會中摩訶
迦葉久滅意根圓明了知不因心念

那律尊者因精進失明而能見賢喜龍王無耳能
聽洹河之神無鼻聞香驕梵受牛哨報故曰異舌
舜若多主空神也其質如風而能覺觸修滅盡定
得空寂者意根斯滅如大迦葉者雖滅意根而能
了知此皆不由不循而發本明耀者也

△三結示

阿難今汝諸根若圓拔已內瑩發光如是浮塵及器
世間諸變化相如湯銷冰應念化成無上知覺
失彼精了由塵起見則根境成礙故脫粘圓拔真
光瑩發則浮塵幻相如湯消冰成一圓融清淨寶

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

覺

△四驗顯

阿難如彼世人聚見於眼若令急合暗相現前六根
黯然頭足相類彼人以手循體外繞彼雖不見頭足
一辨知覺是同緣見因明暗成無見不明自發則諸
暗相永不能昏根塵旣銷云何覺明不成圓妙

聚見於眼則緣明有見之時也急合而暗則暗成
無見之時也六根頭足旣黯然無見而觸之一一
能辨同於明時由是驗之不各自發暗不能昏者
人人具有但脫粘滑塵自成圓妙矣

△五牒審常性二 一問難

阿難白佛言世尊如佛說言因地覺心欲求常住要
與果位名目相應

牒前起難也

世尊如果位中菩提涅槃真如佛性菴摩羅識空如
來藏大圓鏡智是七種名稱謂雖別清淨圓滿體性
堅凝如金剛王常住不壞若此見聽離於明暗動靜
通塞畢竟無體猶如念心離於前塵本無所有云何
將此畢竟斷滅以爲修因欲獲如來七常住果
離幻復真常住不壞名七常住果而見聽六用離

塵無體是斷滅法依斷滅因求常住果烏得相應耶此誤認緣塵迷失常性也由失常性故難契常果實修證大患故須難明也諸佛所得曰菩提寂靜常樂曰涅槃不妄不變曰真如離過絕非曰佛性分別一切而無染著曰菴羅識一法不立煩惱蕩盡曰空如來藏洞照萬法而無分別曰大圓鏡智菴摩羅此云無垢卽第九白淨識也此已成智而名識者以能分別故楞伽曰分別是識無分別是智有空如來藏有不空如來藏有空不空如來藏寶積經曰空如來藏離不解脫一切煩惱不空如來藏具河沙佛不思議法空不空如來藏隨爲色空普應一切後二隨用得名獨空如來藏爲真體故爲果號

世尊若離明暗見畢竟空如無前塵念自性滅進退循環微細推求本無我心及我心所將誰立因求無上覺如來先說湛精圓常違越誠言終成戲論云何如來真實語者唯垂大慈開我蒙恠

復揣六用疑若斷滅而反以佛說湛常爲不誠而近乎戲論不得爲真實語者

△二與審二 一辨迷三 一敘迷

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8

佛告阿難汝學多聞未盡諸漏心中徒知顛倒所因
真倒現前實未能識恐汝誠心猶未信伏吾今試將
塵俗諸事當除汝疑

倒因卽疑惑分別也真倒卽執常爲斷也

△二驗倒二 一約根驗

卽時如來勅羅睺羅擊鐘一聲問阿難言汝今聞不
阿難大衆俱言我聞鐘歇無聲佛又問言汝今聞不
阿難大衆俱言不聞時羅睺羅又擊一聲佛又問言
汝今聞不阿難大衆又言俱聞佛問阿難汝云何聞
云何不聞阿難大衆俱白佛言鐘聲若擊則我得聞

擊久聲銷音響雙絕則名無聞

此但無聲非謂無聞必再擊疊問者欲令審辨而
有悟也

△二約塵驗

如來又勅羅睺擊鐘問阿難言爾今聲不阿難大衆
俱言有聲少選聲銷佛又問言爾今聲不阿難大衆
答言無聲有頃羅睺更來撞鐘佛又問言爾今聲不
阿難大衆俱言有聲佛問阿難汝云何聲云何無聲
阿難大衆俱白佛言鐘聲若擊則名有聲擊久聲銷
音響雙絕則名無聲

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8

上答爲倒此答爲正蓋聲有生滅聞性常在迷情不了以聞同聲是以常爲斷也

△三責惑

佛語阿難及諸大衆汝今云何自語矯亂大衆阿難俱時問佛我今云何名爲矯亂佛言我問汝聞汝則言聞又問汝聲汝則言聲唯聞與聲報答無定如是云何不名矯亂

△二正審四

一顯常

阿難聲銷無響汝說無聞若實無聞聞性已滅同于枯木鐘聲更擊汝云何知知有知無自是聲塵或無或有豈彼聞性爲汝有無聞實云無誰知無者聲塵或有或無聞性未嘗有無所謂聲無亦非滅聲有亦非生此卽不生不滅真常性也夫知無者亦因聞根不可謂無聲則無聞也

是故阿難聲於聞中自有生滅非爲汝聞聲生聲滅令汝聞性爲有爲無

牒上顯常也

△二警發

汝尚顛倒惑聲爲聞何怪昏迷以常爲斷終不應言離諸動靜閉塞開通說聞無性

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

牒上警發使悟常性也。

△三驗常

如重睡人眠熟牀枕其家有人於彼睡時擣練春米其人夢中聞春擣聲別作他物或爲擊鼓或爲撞鐘卽於夢時自怪其鐘爲木石響於時忽寤遙知杵音自告家人我正夢時惑此春音將爲敲響阿難是人夢中豈憶靜搖開閉通塞其形雖寐聞性不昏縱汝形銷命光遷謝此性云何爲汝銷滅

此驗勞生雖枉倒妄生死常性不昏不滅也

△四結告

以諸衆生從無始來循諸色聲逐念流轉曾不開悟性淨妙常不循所常逐諸生滅由是生生雜染流轉若棄生滅守於真常常光現前根塵識心應時銷落想相爲塵識情爲垢二俱遠離則汝法眼應時清明云何不成無上知覺

不悟性常故逐諸生滅能守常性常果可冀矣前令審擇常性爲因地心而阿難牒難故此結告也常光現前根塵消落者謂得其常心則妄塵自減妄塵旣滅法眼自明以此爲因則七常住果於是可獲故曰云何不成無上知覺

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

大佛頂如來密因修證了義諸菩薩萬行首楞嚴經
要解卷第八

音切

緊

烏奚

泊

步各

捐

與專

汨

古忽

媒

莫杯

織

音職

貿

亡

切

黏

女庶

恬

徒庶

頴

蘇朗

宛

其謐

黠

乙湛

怪

音恠

選

切

先

充

頃

傾井

春

書容

遄

市緣

切

金壇

王門虞氏

孫門

王氏共施賛刻此

言楞嚴經要解第

八卷

嘉禾沙彌道悔對

醍寧唐

上元周天祚刻

萬曆甲午仲春徑山興聖萬壽禪寺識

大佛頂如來密因修證了義諸菩薩萬行首楞嚴經
要解卷第九

唐天竺沙門般刺蜜諦譯

烏萇國沙門彌伽釋迦譯語

菩薩戒弟子前正議大夫同中書門下平

章事清河房融筆受

溫陵開元蓮寺比丘戒環解

△二修行真要阿難見性未能證入譬遇華屋不得其門遂請修行方便前示真基則華屋之址也此示真要則華屋之門也文二

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

一解結真要二 一阿難牒請

阿難白佛言世尊如來雖說第二義門今觀世間解結之人若不知其所結之元我信是人終不能解世尊我及會中有學聲聞亦復如是從無始際與諸無明俱滅俱生雖得如是多聞善根名爲出家猶隔日瘧

前第二義門令審業本文云不見所結云何知解故此牒之而請也諸無明通根本枝末也方能暫伏未能永斷故如隔日瘧由不知結解真要故也惟願大慈哀愍淪溺今日身心云何是結從何名解

亦令未來苦難衆生得免輪迴不落三有作是語已普及大衆五體投地雨淚翹誠佇佛如來無上開示身心結惑實未來苦難之本解結之元實免脫輪迴之要

△二真慈開示四

初金手摩頂

爾時世尊憐愍阿難及諸會中諸有學者亦爲未來一切衆生爲出世因作將來眼以闍浮檀紫金光手摩阿難頂

先摩其頂表無上開示也

△二光瑞助顯

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

卽時十方普佛世界六種震動微塵如來住世界者各有寶光從其頂出其光同時於彼世界來祇陀林灌如來頂是諸大眾得未曾有

六震者動起涌吼震擊表破六根妄結也諸佛頂光灌釋迦頂者示同發明無上頂法故次復同音宣告阿難

於是阿難及諸大眾俱聞十方微塵如來異口同音告阿難言善哉阿難汝欲識知俱生無明使汝輪轉生死結根唯汝六根更無他物汝復欲知無上菩提令汝速證安樂解脫寂靜妙常亦汝六根更非他物異口同告者示諸佛脫生死證菩提皆由斯要也俱生卽根本無明也生死妙常同因六根者知見立知故輪生死知見無見卽證妙常如下所明

△三阿難疑問

阿難雖聞如是法音心猶未明稽首白佛云何令我生死輪迴安樂妙常同是六根更非他物

△四正示真要二 一總示二 一長行

佛告阿難根塵同源縛脫無二識性虛妄猶如空華阿難由塵發知因根有相相見無性同於交蘆是故汝今知見立知卽無明本知見無見斯卽涅槃無漏

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

真淨云何是中更容他物

根塵本真故曰同源結解俱幻故曰無二夢識無初故譬空華物境成有故由塵發知因根有相此根塵識譬如束蘆手相依倚雖粗有相其體全空故曰相見無性同於交蘆既無自性則隨緣轉變故於知見立識知之心則結爲無明之本於知見無見覺之妄則解爲涅槃真淨既曰真淨豈容立知故曰云何是中更容他物此總示妄結依根塵識起但妄識不立則妄結自解是爲解結真要所以學道務去識情也

△二偈頌

爾時世尊欲重宣此義而說偈言
偈文句也梵語祇夜云應頌應長行而頌也伽陀云諷誦不應長行而孤起也文二

△初祇夜

真性有爲空 緣生故如幻 無爲無起滅
不實如空華 言妄顯諸真 妄真同二妄
猶非真非真 云何見所見 中間無實性
是故若交蘆

真性之中有爲之法皆空則根塵本空此頌根塵

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

同源也緣生之法皆幻則縛脫亦幻此頌縛脫無二也起滅之法皆無則妄識元無此頌識性虛妄猶如空華也妄法既無真亦不立若言妄顯真真還同妄真與非真尚猶雙非見與所見云何復存當知俱無實體若交蘆耳此頌相見無性同於交蘆也

結解同所因 聖凡無二路 汝觀交中性

空有二俱非 迷晦卽無明 發明便解脫

結解同所因聖凡無二路頌同是六根更非他物也汝觀下牒根塵無體徒因妄結迷晦下頌知見

立知卽無明本知見無見斯卽涅槃也

△二伽陀

解結因次第 六解一亦亾 根選擇圓通

入流成正覺

躡前結解之義起後圓通之文也六解則根拔一亾則湛圓選得圓根則入聖流證聖果矣

陀那微細識 習氣成暴流 真非真恐迷

我常不開演

頌根結初起之由也阿陀那此云執持謂執持種子發起現行卽第八梨耶初起之相故曰微細含

藏種子爲習氣積生識浪爲暴流湛由是分結由
是起也此識依真如合生滅雜乎真妄之間故曰
真非真也若以爲真恐迷妄習而自誤以爲非真
恐迷自性而外求故權小教中皆不開演也深密
經曰阿陀那識甚微細一切種子成暴流我於凡
愚不開演恐彼分別執爲我外道所執神我卽此
識也

自心取自心 非幻成幻法 不取無非幻

非幻尚不生 幻法云何立

頌解結入圓之要也一切諸法唯心所現而於中
取著妄成根結是自心取自心非幻成幻法也由
妄取故有幻非幻若不妄取非幻亦無非幻尚無
幻法何有幻法不立則根塵頓淨圓通現前矣

是名妙蓮華 金剛王寶覺 如幻三摩提

彈指超無學 此阿毗達磨 十方薄伽梵

一路涅槃門

結頌真要也此之法門於淨不著於染不汙名妙
蓮華根境結感擬之則銷名金剛王覺卽爲無爲
亾情絕解名如幻正受依此修進一彈指間可超
無學而入圓位也阿毗達磨云無比法十方如來

1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9 200 1 2 3 4 5 6 7 8 9 210 1 2 3 4 5 6 7 8 9 220 1 2 3 4 5 6 7 8 9 230 1 2 3 4 5 6 7 8 9 240 1 2 3 4 5 6 7 8 9 250 1 2 3 4 5 6 7 8 9 260 1 2 3 4 5 6 7 8 9 270 1 2 3 4 5 6 7 8 9 280 1 2 3 4 5 6 7 8 9 290 1 2 3 4 5 6 7 8 9 300 1 2 3 4 5 6 7 8 9 310 1 2 3 4 5 6 7 8 9 320 1 2 3 4 5 6 7 8 9 330 1 2 3 4 5 6 7 8 9 340 1 2 3 4 5 6 7 8 9 350 1 2 3 4 5 6 7 8 9 360 1 2 3 4 5 6 7 8 9 370 1 2 3 4 5 6 7 8 9 380 1 2 3 4 5 6 7 8 9 390 1 2 3 4 5 6 7 8 9 400 1 2 3 4 5 6 7 8 9 410 1 2 3 4 5 6 7 8 9 420 1 2 3 4 5 6 7 8 9 430 1 2 3 4 5 6 7 8 9 440 1 2 3 4 5 6 7 8 9 450 1 2 3 4 5 6 7 8 9 460 1 2 3 4 5 6 7 8 9 470 1 2 3 4 5 6 7 8 9 480 1 2 3 4 5 6 7 8 9 490 1 2 3 4 5 6 7 8 9 500 1 2 3 4 5 6 7 8 9 510 1 2 3 4 5 6 7 8 9 520 1 2 3 4 5 6 7 8 9 530 1 2 3 4 5 6 7 8 9 540 1 2 3 4 5 6 7 8 9 550 1 2 3 4 5 6 7 8 9 560 1 2 3 4 5 6 7 8 9 570 1 2 3 4 5 6 7 8 9 580 1 2 3 4 5 6 7 8 9 590 1 2 3 4 5 6 7 8 9 600 1 2 3 4 5 6 7 8 9 610 1 2 3 4 5 6 7 8 9 620 1 2 3 4 5 6 7 8 9 630 1 2 3 4 5 6 7 8 9 640 1 2 3 4 5 6 7 8 9 650 1 2 3 4 5 6 7 8 9 660 1 2 3 4 5 6 7 8 9 670 1 2 3 4 5 6 7 8 9 680 1 2 3 4 5 6 7 8 9 690 1 2 3 4 5 6 7 8 9 700 1 2 3 4 5 6 7 8 9 710 1 2 3 4 5 6 7 8 9 720 1 2 3 4 5 6 7 8 9 730 1 2 3 4 5 6 7 8 9 740 1 2 3 4 5 6 7 8 9 750 1 2 3 4 5 6 7 8 9 760 1 2 3 4 5 6 7 8 9 770 1 2 3 4 5 6 7 8 9 780 1 2 3 4 5 6 7 8 9 790 1 2 3 4 5 6 7 8 9 800 1 2 3 4 5 6 7 8 9 810 1 2 3 4 5 6 7 8 9 820 1 2 3 4 5 6 7 8 9 830 1 2 3 4 5 6 7 8 9 840 1 2 3 4 5 6 7 8 9 850 1 2 3 4 5 6 7 8 9 860 1 2 3 4 5 6 7 8 9 870 1 2 3 4 5 6 7 8 9 880 1 2 3 4 5 6 7 8 9 890 1 2 3 4 5 6 7 8 9 900 1 2 3 4 5 6 7 8 9 910 1 2 3 4 5 6 7 8 9 920 1 2 3 4 5 6 7 8 9 930 1 2 3 4 5 6 7 8 9 940 1 2 3 4 5 6 7 8 9 950 1 2 3 4 5 6 7 8 9 960 1 2 3 4 5 6 7 8 9 970 1 2 3 4 5 6 7 8 9 980 1 2 3 4 5 6 7 8 9 990 1 2 3 4 5 6 7 8 9 1000

迥出生死速證寂常莫不由斯故曰十方薄伽梵一路涅槃門薄伽尊號具六義謂自在熾盛端嚴名稱吉祥尊貴

△二詳明二 一重請

於是阿難及諸大眾聞佛如來無上慈誨祇夜伽陀雜糅精瑩妙理清徹心目開明歎未曾有

二偈並頌而雙美故曰雜糅精瑩

阿難合掌頂禮白佛我今聞佛無遮大悲性淨妙常真實法句心猶未達六解一亾舒結倫次惟垂大慈再愍斯會及與將來施以法音洗滌沉垢

無遮大悲言其博濟也性淨妙常真實法句則真妄兩忘稱性之談也沉垢微細結惑也

△二巧示二 一示結之由

卽時如來於師子座整涅槃僧欵僧伽梨擎七寶几引手於几取劫波羅天所奉華巾於大眾前綰成一結示阿難言此名何等阿難大眾俱白佛言此名爲結於是如來綰疊花巾又成一結重問阿難此名何等阿難大眾又白佛言此亦名結如是倫次綰疊華巾總成六結一一結成皆取手中所成之結持問阿難此名何等阿難大眾亦復如是次第酬佛此名爲

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

結

涅槃僧裏衣也僧伽梨大衣也劫波羅云時分卽夜摩天所獻巾也綰縈結也巾喻一性綰喻妄動結渝六妄一一詳問者使悟凡所妄動皆爲結業也

佛告阿難我初綰巾汝名爲結此疊華巾先實一條第二第三云何汝曹復名爲結阿難白佛言世尊此寶疊花緝續成巾雖本一體如我思惟如來一綰得一結名若百綰成終名百結何況此巾祇有六結終不至七亦不停五云何如來祇許初時第二第三不名爲結佛告阿難此寶華巾汝知此巾元止一條我六綰時名有六結汝審觀察巾體是同因結有異於意云何初綰結成名爲第一如是乃至第六結生吾今欲將第六結名成第一不不也世尊六結若存斯第六名終非第一縱我歷生盡其明辯如何令是六結亂名佛言如是六結不同循顧本因一巾所造令其雜亂終不得成

一真如體無異無同六妄結根確然異執則汝六根亦復如是畢竟同中生畢竟異結顯也

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

△二示解之要二 初總敘

佛告阿難汝必嫌此六結不成願樂一成復云何得
阿難言此結若存是非蜂起於中自生此結非彼彼
結非此如來今日若總解除結若不生則無彼此尚
不名一六云何成佛言六解一亾亦復如是
不成謂是非蜂起不成一體也願樂一成莫非解
除結惑不生則同異圓泯故曰尚不名一六云何
成

由汝無始心性狂亂知見妄發發妄不息勞見發塵
如勞目睛則有狂華於湛精明無因亂起一切世間
山河大地生死涅槃皆卽狂勞顛倒華相
前明所結惑業之理此明能結狂妄之心也狂心
之結妄境如勞目之見狂華故曰皆卽狂勞

△二詳示

阿難言此勞同結云何解除如來以手將所結巾偏
掣其左問阿難言如是解不不也世尊旋復以手偏
牽右邊又問阿難如是解不不也世尊佛告阿難吾
今以手左右各牽竟不能解汝設方便云何解成阿
難白佛言世尊當於結心解卽分散佛告阿難如是
如是若欲除結當於結心

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

偏掣左右喻依偏權之教不知真要適重狂勞故
欲解狂勞當解狂心知解狂心則不藉偏權肯綮
修證矣

阿難我說佛法從因緣生非取世間和合麤相如來
發明世出世法知其本因隨所緣出如是乃至恒沙
界外一滴之雨亦知頭數現前種種松直棘曲鵠白
烏玄皆了元由是故阿難隨汝心中選擇六根根結
若除塵相自滅諸妄消亡不真何待

令依出世正智審擇根結本因而解之也若得正
智不惟能知根結本因雖沙界萬類皆了元由矣
阿難吾今問汝此劫波羅巾六結現前同時解縈得
同除不不也世尊是結本以次第綰生今日當須次
第而解六結同體結不同時則結解時云何同除
示六不頓解必由其序也

佛言六根解除亦復如是此根初解先得人空空性
圓明成法解脫解脫法已俱空不生是名菩薩從三
摩地得無生忍

了煩惱結皆由著我則於我無著離煩惱障是得
人空也了所知結皆由著法則於法無著離所知
障是得法空名法解脫人法雙解是名俱空而俱

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

空亦泯心無所起是從正受得無生忍也觀音初
於聞中入流亾所動靜二相了然不生卽先得人
空也如是漸增聞所聞盡盡聞不住覺所覺空卽
成法解脫也空覺極圓空所空滅卽俱空不生也
生滅旣滅寂滅現前卽得無生忍也

△二入圓真要二 一牒請

阿難及諸大衆蒙佛開示慧覺圓通得無疑惑一時
合掌頂禮雙足而白佛言我等今日身心皎然快得
無礙雖復悟知一六亾義然猶未達圓通本根世尊
我輩飄零積劫孤露何心何慮預佛天倫如失乳兒
忽遇慈母若復因此際會道成所得密言還同本悟
則與未聞無有差別惟垂大悲惠我秘嚴成就如來
最後開示作是語已五體投地退藏密機冀佛冥授
慧覺圓通存乎一心已蒙開示故身心皎然圓通
本根冥乎萬法猶未通達故冀佛冥授也密言卽
發明慧覺之言也秘嚴卽圓通本根祕要也慧覺
圓通我固有之故雖因密言還同本悟若不開祕
嚴則與未聞無異故別求開示也二十五聖於根
塵七大各悟圓通是知本根冥乎萬法也佛不顯
說而因衆敷陳是謂冥授退藏密機卽息慮凝心

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

也

△二廣示四

初總發

爾時世尊普告衆中諸大菩薩及諸漏盡大阿羅漢汝等菩薩及阿羅漢生我法中得成無學吾今問汝最初發心悟十八界誰爲圓通從何方便入三摩地圓通二十五門卽十八界七大也七大自十八界開故此不言夫根器萬法唯十八界七大攝盡故此備陳欲令行人於根身器界種種法上顛沛造次得真圓通無少滯也

△二詳明五

一六塵悟入六

一聲塵

憍陳那五比丘卽從座起頂禮佛足而白佛言我在鹿苑及於雞園觀見如來最初成道於佛音聲悟明四諦佛問比丘我初稱解如來印我名阿若多妙音密圓我於音聲得阿羅漢佛問圓通如我所證音聲爲上

阿若多因聲圓悟故曰妙音密圓下云妙色密圓妙香密圓因味覺明妙觸宣明妙法開明文意同此二十五門初標聲塵者先此方教體也雞園無憂王造以迎佛也

△二色塵

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

優波尼沙陀卽從座起頂禮佛足而白佛言我亦觀
佛最初成道觀不淨相生大眾離悟諸色性以從不
淨白骨微塵歸於虛空空色二無成無學道如來印
我名尼沙陀塵色既盡妙色密圓我從色相得阿羅
漢佛問圓通如我所證色因爲上

波尼沙陀云塵性因塵悟解得名昔多貪欲佛令
作不淨觀觀此色身皆卽空塵而因色圓悟

△三香塵

香嚴童子卽從座起頂禮佛足而白佛言我聞如來
教我諦觀諸有爲相我時辭佛宴晦清齋見諸比丘
燒沉水香香氣寂然來入鼻中我觀此氣非木非空
非煙非火去無所著來無所從由是意消發明無漏
如來印我得香嚴號塵氣倏滅妙香密圓我從香嚴
得阿羅漢佛問圓通如我所證香嚴爲上

徧觀有爲而因香圓悟得童真位故名童子辭佛
宴晦者宴坐晦迹齋心作觀也木煙皆非去來不
有意無所緣故由是意銷而發明無漏塵氣滅故
妙香密圓也

△四味塵

藥王藥上二法王子并在會中五百梵天卽從座起

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

頂禮佛足而白佛言我無始劫爲世良醫口中嘗此娑婆世界草木金石名數凡有十萬八千如是悉知苦酢鹹淡甘辛等味并諸和合俱生變異是冷是熱有毒無毒悉能徧知承事如來了知味性非空非有非卽身心非離身心分別味因從是開悟蒙佛如來印我毘季藥王藥上二菩薩名今於會中爲法王子因味覺明位登菩薩佛問圓通如我所證味因爲上善救功成堪紹佛位名法王子曠劫爲醫常善救人也言分別味因者謂了知味性而發明非空有離卽之圓因乃指圓通本根非謂因之悟入也前

言色因後言水因法因同此

△五觸塵

跋陀婆羅并其同伴十六開士卽從座起頂禮佛足而白佛言我等先於威音王佛聞法出家於浴僧時隨例入室忽悟水因旣不洗塵亦不洗體中間安然得無所有宿習無忘乃至今時從佛出家令得無學彼佛名我跋陀婆羅妙觸宣明成佛子住佛問圓通如我所證觸因爲上

跋陀婆羅云賢護洗塵洗體及塵體之中少有所得皆妄觸妄覺故得無所有則妙觸宣明成佛真

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

子名佛子住以善能守護令妄不起令覺不動故
名賢護

△六法塵

摩訶迦葉及紫金光比丘尼等卽從座起頂禮佛足
而白佛言我於往劫於此界中有佛出世名曰月燈
我得親近聞法修學佛滅度後供養舍利燃燈續明
以紫光金塗佛形像自爾已來世世生生身常圓滿
紫金光聚此紫金光比丘尼等卽我眷屬同時發心
我觀世間六塵變壞唯以空寂修於滅盡身心乃能
度百千劫猶如彈指我以空法成阿羅漢世尊說我
頭陀爲最妙法開明消滅諸漏佛問圓通如我所證
法因爲上

摩訶迦葉大飲光也其身金色光吞日月因觀塵
變悟法空寂遂修滅盡定以滅意根不緣法塵得
無生滅故越百千劫如彈指頃于今於鷄足山待
彌勒乃入此定也頭陀云抖擻以能抖擻法塵爲
號

△二六根悟入五 一眼根

阿那律陀卽從座起頂禮佛足而白佛言我初出家
常樂睡眠如來訶我爲畜生類我聞佛訶啼泣自責

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

七日不眠失其雙目世尊示我樂見照明金剛三昧我不因眼觀見十方精真洞然如觀掌果如來印我成阿羅漢佛問圓通如我所證旋見循元斯爲第一阿那律此云無貪乃白飯王子證得天眼樂見照明卽天眼定也定成四大淨色半頭而發障暗皆矚照大千界故曰精真洞然旋見循元卽反妄任真也

△二耳根後特標 三鼻根

周利槃特迦卽從座起頂禮佛足而白佛言我闕誦持無多聞性最初值佛聞法出家憶持如來一句伽陀於一百日得前遺後得後遺前佛愍我愚教我安居調出入息我時觀息微細窮盡生住異滅諸行刹那其心豁然得大無礙乃至漏盡成阿羅漢住佛座下印成無學佛問圓通如我所證反息循空斯爲第一

周利槃特迦此云繼道卽誦筭比丘也宿以慳法報性散鈍佛令數息攝心因而了悟生住異滅諸行無常故反生滅息循無生空而得圓證

△四舌根

憍梵鉢提卽從座起頂禮佛足而白佛言我有口業

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

於過去劫輕弄沙門世垂生生有牛吼病如來示我一味清淨心地法門我得滅心入三摩地觀味之知非體非物應念得超世間諸漏內脫身心外遺世界遠離三有如鳥出籠離垢消塵法眼清淨成阿羅漢如來親印登無學道佛問圓通如我所證還味旋知斯爲第一

憍梵鉢提此云牛吼乃輕弄報也佛爲遮謗賜之數珠令常念佛是謂一味心地法門能滅心緣得入正受亦因教觀舌根嘗味入道觀舌之知不從體生不因物有妄緣併絕名得滅心入三摩地眾生所以迷滯有漏由心緣不斷故滅心絕緣卽超諸漏遺器界也不著塵味不隨妄知是謂還味旋知

△五身根

畢陵伽婆蹉卽從座起頂禮佛足而白佛言我初發心從佛入道數聞如來說諸世間不可樂事乞食城中心思法門不覺路中毒刺傷足舉身疼痛我念有知知此深痛雖覺覺痛覺清淨心無痛痛覺我又思惟如是一身寧有雙覺攝念未久身心忽空三七日中諸漏虛盡成阿羅漢得親印記發明無學佛問圓

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

通如我所證純覺遺身斯爲第一

畢陵伽婆蹉云餘習多我慢習也不可樂事一切苦事也思不可樂法而觸不可樂事因而正觀爲有知故知此深痛雖覺有知之心能覺深痛反覺清淨之心曾無痛覺然此存雙覺其覺未純故又思而進之至於身觸皆凸故諸漏虛盡知痛俱寂故純覺遺身也

△六意根

須菩提卽從座起頂禮佛足而白佛言我曠劫來心得無礙自憶受生如恒河沙初在母胎卽知空寂如佛知見印成無學解脫性空我爲無上佛問圓通如是乃至十方成空亦令衆生證得空性蒙如來發性覺真空空性圓明得阿羅漢頓入如來寶明空海同我所證諸相入非非所非盡旋法歸無斯爲第一

須菩提曠劫解空非唯一世了身空寂故心得無礙洞達宿命了境空寂故十方成空自覺覺他故亦令衆生證得空性然此唯小乘所證之空於性覺真空猶未圓明故逮今發明性覺真空乃能頓入寶明妙性真空之海離二乘見而同佛知見也諸相入非能所皆盡蓋融於寶明空海也旋諸有

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

法復歸至無益歸於寶明空海也
大佛頂如來密因修證了義諸菩薩萬行首楞嚴經
要解卷第九

音切

瘧魚約
糲女又攬覽音
切 楊板緝七入績則力掣昌

切 棘几力鵠紅沃榮於營

呻

金壇王門鄧氏賀氏
首楞嚴經要解第九卷
甌寧唐士登書深水岸本澄刻
萬曆甲午仲春徑山與聖萬壽禪寺識

大佛頂如來密因修證了義諸菩薩萬行首楞嚴經
要解卷第十

唐天竺沙門般刺蜜諦譯

烏苌國沙門彌伽釋迦譯語

菩薩戒弟子前正議大夫同中書門下平
章事清河房融筆受

溫陵開元蓮寺比丘戒環解

△三十六識悟入六
一眼識

舍利弗卽從座起頂禮佛足而白佛言我曠劫來心
見清淨如是受生如恒河沙世出世間種種變化一

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

見則通獲無障礙我於中路逢迦葉波兄弟相逐宣說因緣悟心無際從佛出家見覺明圓得大無畏成阿羅漢爲佛長子從佛口生從法化生佛問圓通如我所證心見發光光極知見斯爲第一

心見眼識也識清淨故種種通利心無際故見覺圓明心見發光光極知見者由心見發明而圓照萬法也迦葉兄弟卽優樓頻螺等或云遇馬勝說偈彼乃小乘因緣非圓通所取身于智慧第一聲德居長故稱長子

△二耳識

普賢菩薩卽從座起頂禮佛足而曰佛言我已曾與恒沙如來爲法王子十方如來教其弟子菩薩根者修普賢行從我立名世尊我用心聞分別衆生所有知見若於他方恒沙界外有一衆生心中發明普賢行者我於爾時乘六牙象分身百千皆至其處縱彼障深未得見我我與其人暗中摩頂擁護安慰令其成就佛問圓通我說本因心聞發明分別自在斯爲第一

行無不遍曰普佑上利下曰賢以周遍佑利故凡具大根修菩薩行皆名普賢之行心聞耳識也分

110 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

別衆生知見者擇普賢行而成就之也

△三鼻識

孫陀羅難陀卽從座起頂禮佛足而白佛言我初出家從佛入道雖具戒律於三摩地心常散動未獲無漏世尊教我及俱締羅觀鼻端白我初諦觀經三七日見鼻中氣出入如煙身心內明圓洞世界徧成虛淨猶如瑠璃煙相漸消鼻息成白心開漏盡諸出入息化爲光明照十方界得阿羅漢世尊記我當得菩提佛問圓通我以消息息久發明明圓滅漏斯爲第一

孫陀羅難陀云豔喜佛親弟世前數息依根所以攝心此觀白依識所以駐心也息由風火而起鼓煩惱濁故其狀如煙昧者不覺唯諦觀能見六交見火燒息能爲黑煙紫焰皆煩濁所發也淨觀發明則煩濁漸消故內明外虛而煙消成白及乎漏盡無復煩惱內瑩發光故出入息化爲光明也消息卽消煙成白也滅漏卽心開漏盡也皆由鼻息發明也

△四舌識

富樓那彌多羅尼子卽從座起頂禮佛足而白佛言

撰述

我曠劫來辯才無礙宣說苦空深達實相如是乃至
恒沙如來祕密法門我於衆中微妙開示得無所畏
世尊知我有大辯才以音聲輪教我發揚我於佛前
助佛轉輪因師子吼成阿羅漢世尊印我說法無上
佛問圓通我以法音降伏魔免消滅諸漏斯爲第一
說法第一辯才無礙因以降魔滅漏皆舌識力也
苦空實相者世間諸法一切無常一切皆苦一切
皆空而中有真常不苦不空如涅槃四德卽實相
也佛以身口意三輪應物無滯音聲卽口輪也

△五身識

優波離卽從座起頂禮佛足而白佛言我親隨佛逾
城出家親觀如來六年勤苦親見如來降伏諸魔制
諸外道解脫世間貪欲諸漏承佛教戒如是乃至三
千威儀八萬微細性業遮業悉皆清淨身心寂滅成
阿羅漢我是如來衆中綱紀親印我心持戒修身衆
推爲上佛問圓通我以執身身得自在次第執心心
得通達然後身心一切通利斯爲第一

優波離云近執謂親近執侍於佛也言親隨親觀
乃至脫欲承教皆明身識欽承也行住坐卧律儀
各二百五十對三聚成三千復以三千配身口七

支復配四分煩惱成八萬四千性業卽殺盜婬等
根於性者遮業卽支末愆失因過遮止者戒律爲
衆綱紀親印我心言衆所印可也我以執身等者
言由持戒故身與身識無不圓通也律中得度波
離第一僧中得度橋陳最初故今堂置橋陳壇置
波離各立本也

△六意識

大目犍連卽從座起頂禮佛足而白佛言我初於路
乞食逢遇優樓頻螺伽耶那提三迦葉波宣說如來
因緣深義我頓發心得大通達如來惠我袈裟着身
鬚髮自落我遊十方得無量礙神通發明推爲無上
成阿羅漢寧唯世尊十方如來歎我神力圓明清淨
自在無畏佛問圓通我以旋湛心光發宣如澄濁流
久成清瑩斯爲第一

因緣深義謂非世間和合麤相乃發明世出世法
故因之發心得大通達神通如意也旋湛者旋意
識而復妙湛故久成清瑩通力圓明清淨自在也
△四七大悟入七一火大

烏芻瑟摩於如來前合掌頂禮佛之雙足而白佛言
我常先憶久遠劫前性多貪欲有佛出世名曰空王

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

說多姪人成猛火聚教我徧觀百骸四支諸冷暖氣
神光內凝化多姪心成智慧火從是諸佛皆呼召我
名爲火頭我以火光三昧力故成阿羅漢心發大願
諸佛成道我爲力士親伏魔冤佛問圓通我以諦觀
身心暖觸無礙流通諸漏既消生大寶燄登無上覺
斯爲第一

烏芻瑟摩云火頭卽火頭金剛也多姪之人本由
煖觸迫發生爲欲火死爲業火業力增熾故成猛
火聚也徧觀煖氣者令恆火大無礙流通也諸礙
旣消故神光內凝成_卽急火發於頭上故名火頭

生大寶燄卽火光二昧也

△二地大

持地菩薩卽從座起頂禮佛足而白佛言我念往昔
普光如來出現於世我爲比丘常於一切要路津口
田地險隘有不如法妨損車馬我皆平填或作橋梁
或負沙土如是勤苦經無量佛出現於世或有衆生
於闐闐處要人擎物我先爲擎至其所詣放物卽行
不取其直毗舍浮佛現在世時世多飢荒我爲負人
爲其推輪拔其苦惱時國大王延佛設齋我於爾時

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

撰述

音釋卷第十一

平地待佛毗舍如來摩頂謂我當平心地則世界地
一切皆平我卽心開見身微塵與造世界所有微塵
等無差別微塵自性不相觸摩乃至刀兵亦無所觸
我於法性悟無生忍成阿羅漢廻心今入菩薩位中
聞諸如來宣妙蓮華佛知見地我先證明而爲上首
佛問圓通我以諦觀身界二塵等無差別本如來藏
虛妄發塵塵消智圓成無上道斯爲第一

平險防損代人濟牛無彼我相表善平心地無有
高下也毗舍浮此云遍一切自在亦由平心故一
切自在也我卽心開下皆因地大圓悟也身界二

塵本如來藏虛妄發生故不相摩觸了本虛妄卽
悟無生矣妙蓮花佛知見地卽諸佛心地法門也
行實圓契染淨雙忘名妙蓮華超出三乘深造一
實名佛知見地持地所持在此而已故得身界塵
消無上智圓也

△三水大

月光童子卽從座起頂禮佛足而白佛言我憶往昔
恒河沙劫有佛出世名爲水天教諸菩薩修習水觀
入三摩地觀於身中水性無奪初從涕唾如是窮盡
津液精血大小便利身中旋復水性一同見水身中

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

與世界外浮幢王刹諸香水海等無差別我於是時初成此觀但見其水未得無身當爲比丘室中安禪我有弟子窺牕觀室唯見清水徧在室中了無所見童稚無知取一瓦礫投於水內激水作聲顧盼而去我出定後頓覺心痛如舍利弗遭違害鬼我自思惟今我已得阿羅漢道久離病緣云何今日忽生心痛將無退失爾時童子捷來我前說如上事我則告言汝更見水可卽開門入此水中除去瓦礫童子奉敎後入定時還復見水瓦礫宛然開門除去我後出定身質如初逢無量佛如是至於山海自在通王如來方得亾身與十方界諸香水海性合真空無二無別今於如來得童真名預菩薩會佛問圓通我以水性一味流通得無生忍圓滿菩提斯爲第一

月太陰水精也昔師水天修習水觀水性圓明故號月光修習水精謂觀水精性也水性無奪者內之津血外之利海水相雖異而性不相奪此卽因水悟圓也浮幢王刹者世界海外諸香水海通號也我於是時至身質如初敍作觀之緣也但見其水謂專於一觀未融四大故未得無身舍利弗於恒河岸入定遭怨害之鬼所掌而出定頭痛亦未

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

得無身故也山海自在通王卽於地水諸大得妙圓通者也月光至此乃融四大故方得無身而性合真空初由水性一味流通耳漢州綿竹縣水觀和尚迹同月光稠禪師入火光定其室如焚亦此類也

△四風大

琉璃光法王子卽從座起頂禮佛足而白佛言我憶往昔經恒沙劫有佛出世名無量聲開示菩薩本覺妙明觀此世界及衆生身皆是妄緣風力所轉我於爾時觀界安立觀世動時觀身動止觀心動念諸動無二等無差別我時覺了此群動性來無所從去無所至十方微塵顛倒衆生同一虛妄如是乃至三千大千一世界內所有衆生如一器中貯百蚊蚋啾啾亂鳴於分寸中鼓發狂鬧逢佛未幾得無生忍爾時心開乃見東方不動佛國爲法王子事十方佛身心發光洞徹無礙佛問圓通我以觀察風力無依悟菩提心入三摩地合十方佛傳一妙心斯爲第一

因風大悟圓身心發光洞徹無礙號琉璃光無量聲佛亦依風大開示菩薩使知本覺無動而身界之動皆風力所轉琉璃光因是觀界觀世觀身觀

110 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9 200

心遷流運止悉唯風力故曰諸動無二由是覺了大千群動皆卽狂勞猶百蚊蚋鼓於方寸耳旣了狂勞乃見不動佛也東爲群動之本而佛號不動乃卽動而靜者也能卽動而靜故身心無礙也傳一妙心者知風力無依萬動皆妄而獨證無動本覺也

△五空大

虛空藏菩薩卽從座起頂禮佛足而白佛言我與如來定光佛所得無邊身爾時手執四大寶珠照明十方微塵佛刹化成虛空又於自心現大圓鏡內放十種微妙寶光流灌十方盡虛空際諸幢王刹來入鏡內涉入我身身同虛空不相妨礙身能善入微塵國土廣行佛事得大隨順此大神力由我諦觀四大無依妄想生滅虛空無二佛國本同於同發明得無生忍佛問圓通我以觀察虛空無邊入三摩地妙力圓明斯爲第一

因證空性故性中所有一切皆空身與刹海涉入無礙號虛空藏定光卽熒燈佛也於定光所得無邊身者法身如空無有邊際必假心燈寂照而後發明也執四寶珠等者由觀四大無依妙力圓明

112345678918011234567891901123456789

而照了法界一切皆空所謂虛空無二佛國本同
也又於自心現大圓鏡等者亦由四大無依妙力
圓明於圓洞心內瑩發光而交徹融攝也幢王刹
卽華嚴法界刹名

△六識大

彌勒菩薩卽從座起頂禮佛足而白佛言我憶往昔
經微塵劫有佛出世名日月燈明我從彼佛而得出
家心重世名好遊族姓爾時世尊教我修習唯心識
定入三摩地歷劫已來以此三昧事恒沙佛求世名
心歇滅無有至熒燈佛出現於世我乃得成無上妙

圓識心三昧乃至盡空如來國土淨穢有無皆是我
心變化所現世尊我了如是唯心識故識性流出無
量如來今得授記次補佛處佛問圓通我以諦觀十
方唯識識心圓明入圓成實遠離依他及徧計執得
無生忍斯爲第一

彌勒此云慈氏爲慈隆卽世悲臻後劫愍物迷識
故示迹發明也心重世名好遊族姓者迷識着境
故外慕妄求也從燈明教而名心頓歇者了識依
智則迷妄自除也熒燈佛現乃成妙圓者迷妄既
除心燈卽現心燈旣現則萬境妙圓矣得是妙圓

撰述

三昧遂了三界唯心萬法唯識故盡空如來皆我心變國土淨穢亦我心變無量佛性從此發揮是謂流出無量如來至得補處亦不離此也識心圓明入圓成實等者由妙圓識心證入實智不復迷識逐境種種計着也

△七根大

前云見大此云根大者前舉一例諸此舉總兼別大勢至法王子與其同倫五十二菩薩卽從座起頂禮佛足而白佛言我憶往昔恒河沙劫有佛出世名無量光十二如來相繼一劫其最後佛名超日月光彼佛教我念佛三昧譬如有人一專爲憶一人專忘

如是二人若逢不逢或見非見二人相憶二憶念深如是乃至從生至生同於形影不相乖異十方如來憐念衆生如母憶子若子逃逝雖憶何爲子若憶母如母憶時母子歷生不相違遠若衆生心憶佛念佛現前當來必定見佛去佛不遠不假方便自得心開如染香人身有香氣此則名曰香光莊嚴我本因地以念佛心入無生忍今於此界攝念佛人歸於淨土佛問圓通我無選擇都攝六根淨念相繼得三摩地斯爲第一

大勢至亦名無量光觀經云以智慧光普照一切

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

令離三塗得無上力名大勢至今表念佛三昧能
發智光離三塗苦其力無上也所值之佛名無量
光十二如來相繼一劫最後名超日月者表念佛
之人自性如來十二時中淨念相繼則無量性光
終自發明超於日月也觀經曰夫念佛者不得一
彈指間念世五欲是謂繫念脫能如此一無間雜
則無量性光自然發明下所謂不假方便自得心
開者此也譬如下示必須繫念然後相應不專念
佛則雖逢不逢雖見不見也染香則襲香念佛則
見佛故以念佛妙薰名香光莊嚴也念佛得忍者

蓋以淨念蠲濁想正念滅邪受邪濁既遣心境空
寂一切不生名無生忍如此則自性佛土淨矣故
可攝行人同歸也

大佛頂如來密因修證了義諸菩薩萬行首楞嚴經
要解卷第十

音切

隘鳥介音

切

填田闕音

還闕音

推胡對音

切

液余石窺去音

切

窺去規音

稚直利捷音

切

激擎擊音

金鑑居士王林鉢

首楞嚴經要解第十一卷

嘉禾沙彌道海對

甌寧縣唐士登書

祁門李芳刻

萬曆甲午仲春徑山與聖萬壽禪寺識

王林鉢共施賈刻此

王林鉢共施賈刻此

王林鉢共施賈刻此

王林鉢共施賈刻此

王林鉢共施賈刻此

王林鉢共施賈刻此

王林鉢共施賈刻此

王林鉢共施賈刻此

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

大壯貞牧東郊因外筮子美能占
同歸子入同體也子勿繫念然後相應不專念
疑一也不主名無坐忘吹拊自垂韁上歌矣姑
蓋以射合體戰慙五念茲來受采歌鴻濤少意空

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

牛

牛